





國朝第一選本

毘陵蔣玉淵先生選

清詩初集

崑州馬氏藏

清詩初集序

詩之有選自三百篇始也詩之以朝代為推移而有初盛中晚之分則自唐始也初盛中晚之說創於宋之嚴儀而成於明之高棟論者疑之謂張燕公與曲江皆初唐而岳州荊州以後多激昂繁變之音則二公亦初盛以燕公系初唐遡岳陽唱和之作則孟浩然亦盛亦初以右丞系盛唐酬春夜竹亭之贈同左掖梨花之詠則錢起皇甫冉亦中亦盛一人之身更歷二時將何所據以為斷歟然自初盛中晚之說出後世讀其詩者細繩其體格聲響亦往往殊焉未嘗不歎嚴高兩君之言誠無以易也夫詩之為初盛為中晚亦猶三百篇之有

詩初集

序

蔣

鏡閣定本

國朝第一選本

毘陵蔣玉淵先生選

清詩初集

蕙州馬氏藏板

清詩初集序

詩之有選自三百篇始也詩之以朝代為推移而有初
 盛中晚之分則自唐始也初盛中晚之說創於宋之嚴
 儀而成於明之高棣論者疑之謂張燕公與曲江皆初
 唐而岳州荊州以後多激昂繁變之音則二公亦初亦
 盛以燕公系初唐遡岳陽唱和之作則孟浩然亦盛亦
 初以右丞系盛唐酬春夜竹亭之贈同左掖梨花之詠
 則錢起皇甫冉亦中亦盛一人之身更歷二時將何所
 據以為斷歟然自初盛中晚之說出後世讀其詩者細
 繩其體格聲響亦往往殊焉未嘗不歎嚴高兩君之言
 誠無以易也夫詩之為初盛為中晚亦猶三百篇之有

清詩初集

序

蔣

鏡閣定本

止變云爾正風其初也大雅三頌其盛也變風變雅其
唐之中晚乎由是以推漢興大風之歌安世房中諸曲
其初也秋風瓠子太乙芝房寶鼎駸駸乎盛矣東京以
下作者其為中晚乎魏晉六朝氣運偏駸難以例推然
如黃初鄴下力返正始過江諸謝風藻陸離初盛之差
數觀矣玉樹後庭子夜讀曲其為中晚乎唐承六朝淫
靡之餘其變而之上也難故雖如椽巨手若燕許二公
喬皇鐘咯可謂盛矣而僅系以初然則初者極衰之轉
振而甚盛之萌芽也豈偶然哉明初劉袁高楊諸公振
響於前長沙京山嗣音於後至七子而其盛極矣公安
竟陵以自然刻露相為救氣格少下流於中晚而不知

此亦勢之無如何者也我

朝運際昌期詞賦之盛遠邁千古

世祖章皇帝時勝國遺賢如錢牧齋吳梅村龔芝麓王覺
斯熊雪堂諸君子同祖風騷執耳壇坫斌斌乎含燕而
吐許矣

今上藻思天縱萬幾之暇留神翰墨日與臺閣侍從諸臣

賡歌拜手一時若高陽寶坻益都真定蔚州崑山定州
桐城華亭宣城新城諸作者莫不大呂黃鐘競鳴迭奏
而風雅所蒸山陬海澨之士亦各扼腕而談四聲侈白
雪猗歟休哉無乃盛歟而予則斷斷以為初焉者何以
故夫詩與樂相表裏者也作樂者必審律以定聲而律

詩律

蔣一 鏡閣定本

始於黃宮之子得天地之初氣是以斷嶰竹而吹之叶
鳴鳳之雌雄太和之元音起焉邃古以前其詩不傳卿
雲糾縵喜起賡颺作於洪荒初闢之際遂為百代詩歌
祖而五子怨懟北里淫哇詩愈甚而愈下矣初之為義
顧不重歟且夫天下之物莫不有初花之始莠也苞英
咀華鮮艷奪目比其爛熳離披則封豸妒之日月之初
也光彩常新至於盛滿鼓缶而歌矣詩莫盛於唐唐詩
之盛莫如開元天寶然子美必祖審言而沈宋蘇李諸
公終為冠冕八代初也者祖也必然之理也此子於
國朝詩選定以初名顧將使當代之知所宗而後起之知
所守義至矣特予寡昧烏足揚扈休明但束髮以來志

存

國雅長而挾策通都所交賢豪長者無不綴玉聯珠更和
疊唱歲月浸尋積有各種未忍自秘謹與翁子武原分
體彙輯得十二卷公之寓內惟人不數什未免一瓣半
豹之恨然以是為召雲命呂之嗚矢亦於初之義有合
焉爾

肯

康熙歲次辛酉夏至日毘陵蔣鑰謹述於武昌雄楚樓
之西偏



序

詩之盛也莫今日若詩之濫也亦莫今日若惟其盛故不能無濫惟其濫則不得無選而別其次第之體裁往予於西湖與二三同人於鏡閣論詩丙辰春適蔣子玉淵來自毘陵更出其歷年祕錄論列今昔獨有淵原因謂蔣子曰詩自三百篇以降至漢爲正始元音迨魏晉氣格遞變浸淫齊梁陳隋流入綺靡愈變愈下至唐開元天寶間乃備美一時振拔千古盛已五代時文字磨滅與世運俱淪無詩宋非無詩也特以理學與騷雅雜出二者謬不相入卽謂之無詩亦宜元以詩餘填詞擅場正音大雅衰矣勿問故其爲詩亦多不傳自明代風

氣一振矯敝古今以漢魏三唐爲宗如濟南景陵公安
雲間諸君子各主騷壇樹幟當代我

朝定鼎以來數十年間羣才畢出燿燦當時不惟起五季
宋元之衰並且超軼前代大有過於王楊盧駱雖以初
名實盛矣萬里聲華一代國寶寧忍聽其散失而弗彰
是烏可以無集於是相與商訂廣羅風雅炳燿千秋以
垂不朽獨恨九州廓落車塵馬跡所未着至若名嶽鉅
浸有負絕世才而不姓氏人間者孰能如青蓮少陵孤
舟萬里匹馬千關爲搜奇獵勝也者蔣子深以予論爲
快曩因家大人宦西粵遷於秦隴往來覲省乃舟揚子
帆彭蠡閣登滕王陟大庾嶺以西盤紆南徼極蠻煙瘴

海地然後豫章兩粵之風物名勝可得歷歷也殆策騎
天中殺函潼關五陵咸陽隴右之際然後韓魏三秦之
人物形勢可得歷歷也厥後出百二雄關後九折之黃
流驅車汾晉攬古朔漠沙磧遺趾及五帝三王並後季
諸侯所建都地與近代仕宦若遺老於以登碣石觀滄
海振衣黃金臺上然後趙晉燕薊之國風人材可得歷
歷也及承乏黃州祖自冀北至於齊魯若青若徐若淮
若揚溯洄蘄黃江夏又奉檄從軍泛舟洞庭登衡嶽弔
九嶷故跡則荆楚之雄風又可歷歷也諸所經過地悉
憑軾徘徊迂途問訪與結聲氣觀禮樂文章而去所得
遺詞逸稿並西湖故所未卒業者欲綜集之值楚塞用

清言初集
兵繁劇交錯不遑計及歲庚申蔣子忽溯挽長江晤子於赤壁前喜慰交至此數年來蔣子之蒐羅益廣更以予之閱歷紀采取以印可蔣子翻然起曰是業成矣昔龍門太史欲成漢家一代全書恨所有未及耳目乃輒環十二州而歸書於是乎就以是知今古有心人得毋千載有同券耶予避席曰是安敢上擬子長公也但足跡聞見所到不敢少有埋沒賢者以爲

國朝光若其濫中別盛盛中遴精是在吾子進退之知幾斛明珠中自能尋徑寸夜光也各出錄本刻日糾工聚精會神以竟厥緒予適役武陵蔣子遠寄成書不禁於焦勞煩困之中爲之蹶然而起以誌予兩人相與有成

如此云

康熙二十年歲次辛酉之夏錢塘翁介眉題於邸解之
惜陰齋



是集爲予中表父行馭鹿先生所采十五國風成帙者也刊板楚中歷今廿餘年矣嘗以其大父鷺洲公守漢陽人祀之如桐鄉以故爲江漢寓公久歲戊辰遭夏逆弄兵先生倉卒走避九真山中圖書詩版散失迨盡是集亦遂淪落人間戊寅予入楚潛搜物色幾一載始獲于黃龍寺僧廡點檢卷目首尾零落十分之三先生喜而出涕歎曰不俾吾心血湮沒者子也遂以授予載之南下并屬增補校輯冀成全璧予僶勉丹墨閱一歲至庚辰夏乃告成先生喜復以二集未竟之業見委曰吾老矣子英分過人識力迴出當爲吾成此志予不敏是以有二集之繼先生又嘗以太白授草陽冰事指心相

清言不身月
託予再拜領之今墓已宿草而得當無日傷如之何先生所著有紀遊詩約三十種已刻者一十有八曰遠雲詞曰雜著曰太平春曰桃花飯兩傳奇癸未至日後學馬道畊識



凡例 十二條

一是選始於丙辰之夏客遊湖上與翁子武原各出藏本不下數百家因僑寓於祖山僧舍午夜篝燈共相校讐迨匝月而武原卽省覲秦川予亦薄遊吳會未及成書庚申春日放櫂漢江適武原分署岐亭尋理舊業武原又以驅馳王事不獲晨昏幸與牛子潛菴時加欣賞越歲共八月始告厥成

一選家例有徵啓先期傳布廣積郵筒然後從事丹黃子則採輯於平時或由專稿或拾殘箋凡有合於聲調者咸筆之簡首高山景行誠有素心至挂一漏萬貽譏不免容俟二編彙成以開固陋之罪

一編次無分後先較正寧論甲乙山林廊廟悉屬等觀入斯集者固美前茅尤誇後勁

一選本具載爵里姓氏以別顯晦殊非善道况數十年間海內名公孰情風雅者如景星慶雲靡不畢覩故茲集止註氏籍其字號則互書之郡邑槩不列前代別名紀實也

一作者林立美不勝收以工費浩繁限於篇什諸體全備者固足稱雄間有僅錄一體者亦堪珍貴

一集中諸詩俱按律審音嚴加選擇務求淡渾淵涵一歸大雅皇皇巨觀實備一朝之盛

一前列較定姓氏俱予昔同硯席或久經唱酬者方與參稽絕非仰企嘉名為攀援德色

一鴻篇大章積案充棟武原復彙輯郵傳予一手拮据不憚寒暑而眼光所及鏡悉妍媸選載集中當無魚目混投之歎

借閱名家稿本初在西陵則就商於方子渭仁毛子稚黃王子丹麓及家弟波澄來寓漢上則取資於熊子元獻李子仁熟張子石虹羅子魯峰厥後李子劬菴寄自景陵葉子井叔郵來黃郡篇帙纍纍備採尤多此皆有意匡維吾道者不可以不誌

一選本底稿皆親自裁訂並未假手書傭魯魚亥豕或可免焉

一近來緇流羽士閨秀名姬清思艷詠頗多佳製若槩
行編入似非雅觀行當另增二卷附行問世
一是刻將成遠方郵寄折柬紛投其間姓氏多訛里居
未晰或素昧平生單刺遙致者槩不敢輕入

蔣 鏞載頓首



清詩初集

目次

第一卷

樂府

第二卷

五言古詩

第三卷

五言古詩

第四卷

七言古詩

第五卷

七言古詩

第六卷

五言律詩

第七卷

五言律詩

第八卷

七言律詩

第九卷

七言律詩

第十卷

五言排律

七言排律附

第十一卷

五言絕句

六言絕句附

第十二卷

七言絕句

清詩初集卷之一

武進蔣 鏞玉淵

後學馬道耕重校

錢塘翁介眉武原

長治牛 負潛菴

吳江顧有孝茂倫

遂安方象瑛霞莊

漢陽熊正笏元獻 定

樂府

對酒

王士禛

阮亭新城

對酒歌慨慷自我屬有生共得覩太平皇帝陛下惟樂
康官府治丞相無私人諸諫官彈射姦慝咸有直聲自
中丞刺史良二千石各各有廉名日南交趾皆我郡縣
蠻彝君長以時稽首殿廷屬國具為令文笥生翠來玉

京幸太學三老而五更遂賜民爵一級存問長老遣都吏循行大酺十日除宮刑美人曼壽百室豐盈

有所思

李 蔚 坦園 高陽

有所思乃在岱宗之巔玉書金檢不可覩七十二代空
茫然仄聞黃虞前結繩物自理書契胡為乎千秋殉蒼
史河中之馬本無文仰觀俯察徒紛紜

陌上桑

青青陌上桑不許路人折盈盈桑下女不為路人悅將
物比貞心黃金不如鐵

長相思

孫枝蔚 澹堂 三原

長相思在西方岐山之下無鳳凰豈無鳳凰荆棘參天

梧桐歎那有竹實可為糧忍饑却向東南飛歲暮天寒
道路長吁嗟鳳凰身有五色之文章不如鴻鴈多稻梁
淮陰雖乞食後來遇主為侯王伍員雖乞食復讐可以
見父兄陶潛乞食猶可憐身無官職田園荒長相思淚
千行

江南曲

韓 詩 聖秋 涇陽

江南可種禾禾苗油油波馬喜禾苗多東有馬嚙禾西
有馬嚙禾北有馬嚙禾南有馬嚙禾

懊儂歌

周亮工 櫟園 祥符

約誓不相離夢裏與歡遠儂意正可憐歡言夢是反
向河哭

清言不集
向河哭風肅肅一聲能兼幾骨月

白苧詞

李雯 舒章 華亭

美人心舞舞七盤手持明巾拂朱顏玉蔥婉約金翠環
流波迤逸為君妍沐以清風芳以蘭冉冉不絕如雲間
傾心送君君不言玉壺箭短明星繁曲終私語低春山

華山畿 四首

宋徵輿 華亭 轅文

朝相思起看燈燭盡憶汝風流時

何敢來相知儂家天上住汝無登天梯

六懊惱蜘蛛慕蜻蜓牽絲常不了

何得如許別夜夜作夢後抱被不得熱

作蠶絲

王熙 胥庭 宛平

一絲已在手心隨百絲轉中間不斷絕將來成匹練 解一

春蠶附柔桑桑葉採自難將蠶比飛鳥何以有羽翰 解二

蠶絲淨如雪牕前慢把玩那得成錦紋絲絲自相貫 解三

織手弄絲時笑我顏色好春蠶相向多幽心亂如草 解四

車遙遙

曾畹 庭聞 寧夏

車遙遙兮馬麟麟君適燕兮妾在秦道路遠兮不可言

願隨輕塵觸君轅轅不轉兮妾淚濕君行千里何太急

飛龍篇

孫治 宇台 杭州

乘騎萬里遠過蓬萊仙者四五綠髮青鬢鳴琰吹笛要

我天街謂予小子名在丹臺冠我霞冠飲我露杯謁彼

上皇金闕崔嵬教言神藥鳳腦龍胎身生毛羽永絕塵

荒田行

方拱乾 坦菴

旅食不飽退而力田田荒十斛收三斛縣吏騎馬大聲
 扣門索租錢租錢入官什取五租錢入吏什百且什千
 五月糶穀從來苦今年新穀賤如土鉛銅錫鐵雜為銀
 官壚大鑄煙成雨庄奴貪庄農黠公空倉私狼粒計窮
 只得賣荒田舉手贈人誰人憐富者不肯貧者不能賤
 者不敢惟有抱曉响而顛躓號呼于五風十雨之天亂
 曰種荒田不得粟賣荒田不得金搔首長饑不識天心
 我饑猶可民饑勝我荒政十二兮首蠲租大臣不問兮
 更如讐春風吹雨兮青我疇蔗蓑古人不我欺兮夜起

視牛

城邊路

紀映鍾 葉子江寧

城邊路歌舞處十年變為基十年犁為田十年為淺渡

短歌行

魏裔介 貞庵

我有長劍掛壁不試我有旨酒盈樽不醉 解一年華一去
 不可再來讀書萬卷沸溼奇懷 解二天下多故宜用俊傑
 筐篚小智難與植業 解三為爾寂寂鄧禹笑人顏色憔悴
 自冬徂春 解四折脅拉齒范睢則相褚冠疇伍輿人是謗
解五周道如砥其直如矢百鍊之剛化為繞指 解六鴻鴈銜
 蘆載翺載翺畏彼增繳遠至瀟湘 解七維水有潏維山有
 岑高臥雲霞慰此素心 解八

調笑引

郭石公清風妓席詩以佐歡二首

黃永

艾庵武進

坐客方滿堂是郎同年友同年不同心夜深猶索酒
郎作廣陵談妾縮中州髻不解郎罵人解郎笑人意

前緩聲歌

陸圻

麗京錢塘

却行之人必有倒景之天但當三緘莫犯教言黃口小
兒心乎悲矣獨悲誰能安因復思白膏之鳳必有青血
之驪烏號夏服飛土逐穴斷竹以續竹當令皇帝陛下
同景福

君馬黃

杜立德

純一寶坻

君馬黃黃六驥臣四牡轡在手維駟與驕載以有遵彼
周行馳爰與四方宜前士執者及後有雲旗呼相激胡

為中道忽賊虜頓令旁人無所知毋迺任曲麓毋迺臨
水濱毋迺旬旬莽未諳指顧徒搶攘胡不熟晚隰與原
靜調羣力相勇往再言勿惡駕無從容善向中條趨

獵人謠

張綱孫

祖望錢塘

欲得虎不如殼弩弓可四十弩可三百

築堤謠

李勅

天敘與化

歲築堤築堤苦止二更作五鼓十人餽粥一人羹刺期
會食時用午河凍冰裂鑿冰破膚鑿冰行取泥賤命而
貴土寒雲漠漠天雨霜督工長官髭鬚黃烹羊宰牛持
大觴持大觴威如狼

履冰行

履冰行墮冰灰前人雖墮後不止嗟彼小民慙不畏灰
匪不畏灰家有婦子

翁離

楊大鶴武進

翁離趾中築宮其間何以成之杞梓榱桷干雲蔽日托
根南山欲往斧柯虎豹斑斕借問大匠誰公輸與魯般
咄嗟苦計窮天子宣合城郭人民家但有杞梓榱桷按
籍中大匠捧黃紙軒軒騎高驥

戰城南

戰城南城南壁王師貴萬全賊兵狡獪勿輕擊自春徂
秋冬飛輓供軍食牛馬灰山澗黎首樹道側賊宵遁踰
時設爲疑兵列旌旗居民聞知携老孥幼迎王師王師

奮飛白骨藉藉流血成渠城外千里無人居城中日烹
鮮割肥鬼妾鬼馬盈路衢捷書飛奏甘泉宮詔念甲士
苦嘉將軍功

寄髮詞

徐延壽存禾

頭上髮金刀截寄君邊怨離別縷縷復絲絲與君相決
絕連若不成環斷豈終成玦矣今寄髮如寄心君當見
髮如見血髮兮髮兮兩纏綿但願他生早相結

公無渡河

梁清標蒼巖

公無渡河河廣風浪高行旅卻步不敢進舟子招手聲
嘈嘈陽侯天吳爭跳舞中流執楫人徒勞石巉巉兮灘
勢惡颶風吹沙湧萬壑公無渡河前舟已覆後舟旋盤

清言不集
渦蟠竦如梁互河斤。瞬息變化蛟龍多。嗟嗟公無渡河
不如歸去棲山阿。

驛卒謠

前驛聞官逃後驛傳馬死安得穆王八駿來絕塵一日
馳千里

野田行

宋之繩其武

野田水縱橫流青蒲細藻生前溝田水到溝溝不流下
有大澤溝盡頭澤深廣幾千尺煙波浩浩魚龍宅百泉
注此可以淳洄天風怒號驚濤載催如驅萬馬騰于大
野西流流東其逝如瀉岷江之來萬里必至于海而此
田漑漑乎去不相待天地氣接雨施物滋滙而成流洪

繼等斯故知萬派各有極此水何嘗與海期

長相思

王鴻緒儼齋

憶君在時桃花紅。雙雙花下坐春風。今君別去花仍在。
爛熳晴光映綺櫳。下階殷勤折一枝。欲將千里寄相思。
又恐飄零中路時。桃花分桃花迎風開分迎風落點點
斑斑飛繡幕。花到明年還復春。妾貌如花難似昨。

讀曲歌

楊瑀組玉

終夜枕儂臂聽郎夢中語不似語儂意。

子夜歌

錢光繡聖月

夜深歡外來倒儂牙牀側問歡不肯應持燭照顏色

望歡曲

李夏器不器

未知歡去向使儂復西望儂作酒家帘風吹兩邊颺

喜擒叛

成性我元

驚咳不揚蠅聲不昌烏名不常逆天者亡已乎已乎孰有圃而生之杞乎

讀曲歌

方象瑛霞莊

有字不敢寄亦如歡所思夜夢到歡邊問歡知不知

將進酒

施閏章愚山

將進酒羅羣賢合四座陳廣筵履舄錯蘭膏然弛珮帶步華軒蠲憂端齊歡顏歌既醉酣忘言舞陽阿揮朱絃曲雜奏心相憐薄富貴樂當年願更酌要列仙壽千春白髮玄

忼慷歌

畊田求食苦不得息起而為吏薄食我力念為良吏何可得解一貪吏受錢甘如飴身安逸樂廉潔何為入無以娛室家出無以游賢豪長者遺我心所思何不歸故鄉與妻子共舖糜解二念為貪吏子孫愚受人唾念為廉吏子孫雖賢常苦饑嗟彼子孫誰人丈夫各有志何當為爾作計身受惡名為解三

采茹謠

曹溶秋嶽

恆山高百丈飛石不可向上有金屑錢下有虎風嶂六月大雨來芝作仙人杖是芝非芝聊備餐含青吐紫雲盤盤東家力田收十斛牛馬無芻飯不足西家女兒花

作裙提筐上山下山谷但采茹莫種粟

妾薄命

柴紹炳虎臣

西家處女玉顏三五二八之間遺世獨立盤桓複襦輕
裾羅紈繡帶微風自還見者髣髴神靈擇嫁無媒爾馨
塗修之鳳青青惜彼賢雄窈冥春花夕月秋螢深閨撫
枕涕零迨其謂之齟齬要以匹雙致殊云是大夫秋胡
又云馮氏子都却還徑寸明珠賤妾猥辱泥塗已矣勿
復沉吟豈不懷歸好音竿笙簫管瑟琴倡子和汝同心
望望山高水深薄命差池至今

暮夜金

蔣賓坊侯齋

暮夜金有四知星月皎皎敢不辭待欲辭亦已遲趨起

廡下何繇進那待臨時辭色峻還是生平肝膽未相信

烏夜啼

許虬竹隱

城頭白項烏開齒夜對月明啼不止城鼓鼕鼕未四聲
可憐明月化清水烏啼不已月色闌長干夜氣沙塲寒

新翻子夜歌

吳偉業梅村

歡今穿儂衣窄身添扣扣欲搔麻姑爪教歡作廣袖
合香吐聖火碧縷生微烟知郎心腸熱口是金博山
歡有領下貂與儂覆廣額脫儂頭上珠為歡嵌寶石
龍團語羊酪相逢土風異為歡手煎茶調和見歡意

拱辰篇

郝浴雪海

天縱一人來三代如逝水於戲天縱一人來知是周武

文湯禹舜神堯之嫡子孝格七聖心深明孝旨天縱一人來七聖皆不死夜夜簪縹筆曳絳衣磬立辰下在紫氣裏曾參尾之抱河洛書違不能咫黃玉開天心喜一十八篇今在此

麟史篇

一聖照天下赫然燭龍天下受照孰敢不忠二百四十年于公卿諸侯大夫士專誅不忠以教忠大忠在麟筆胡為問馬融

禽言

王紫綬蓼航祥符

姑惡姑惡人苦魚樂波臣日日鄰為壑婆餅焦老垂髻僕區法重漫相招摘桑看火袒右袒左欲廉不可貪不

可行不得哥哥黃犬蒼鷹隨紫駝白狼玄狸雜青騾跌坐攆逾銀鑿落長跪穹廬金叵羅行不得哥哥

變何嘗行

馬神雲翎無錫

王侯雖尊不慕則賤我家南山有樹有澗一薰風樹下來臨澗浮青樽酒盡未醉復遇故人挈瓶向前村二故人且閉戶不可得猶勝朱門中捧觴默默公卿側解來前為君今歌採菱篇採菱逢長風竟夜不得眠曉來望南山白雪高于天鑿冰取魚船有炊煙歡笑命妻子牀頭數酒錢三來日苦短多憂何為蒼生喁喁亦有官師蒲輪未至我友傷悲我當登南山望君他日趨朝時

解四

桑穀拱

蔣遵路路然無錫

祥桑朝生暮成拱生何易歟何遽天道難知德可據予有臣伊陟臣扈巫咸俾予助祥桑之生如屈軼重譚來海外截上帝嘗予予敢逸

據地歌

丁澎葯園仁和

欲逃于俗深山多虎羆待詔金馬之門飽食安步曾不知是與非索長安米甘如飴何必藍田之芝首山之薇

讀曲歌

董以寧文友武進

怪侍妾侍妾好顏色葉上小青牛秋來變蝴蝶

束哲歌

程可則石臞南海

束先生何神明三日不雨民無生至誠感天天雨傾陽

平之稷九穗一莖願以長年敬答先生束先生何神明

休洗紅

休洗紅洗多紅減色不惜紅減色故人親手織染絲作縷會幾時吁嗟人事有變衰

擬古

金敞廓明武進

日暮捲簾子聞歡墻外語莫便出迎歡窺歡何處去

讀曲歌

萬壽祺年少淮安

不願與歡飲不願與歡眠願歡口中言

莫參差槿花嫁蜂蛸為歡當及時

潯陽歌

彭而述禹峯鄧州

舫艫下九江南兵此處降捲甲彭蠡湖棄馬匡山陽老

侯鼻息剛如縷小侯腰膝已無主鳳凰山上白額虎
琵琶洲上出穴鼠虎耶鼠耶侯豈知耶

頭白烏

顧人龍雲平湖

頭白烏尾畢逋開口發聲爭彈戈徒生八九子不得哺
其雛嗶伊繞樹復四顧鳴者愈急人愈怒吉凶繇人豈
繇我縱我無聲亦無補白烏何尤至于此愁苦叫闍訴
天帝但願為黃鶯朝啼建章柳暮宿長楊枝高轉一聲
嬌不已千門萬戶春風宜城頭殿角難追隨難追隨不
相及仲尼道大子輿直到處不容終阨塞閉戶著書猶
默默寄言頭白烏慎勿多號呼汝既不悅人耳目爾身
未免遭驅逐今人皆憎汝焉能復推屋

飲馬窟

范光文潞公

健兒飲馬學馬飲槽頭汲酒如汲井酣歌解鞍高作枕

子夜歌

張縉彥坦公

儂如黃蘗根歡似天上雨雨多根葉肥爭奈心中語

高陽樂人歌

二首

可憐綵夾裙挾瑟入朱門欲訴別離恨怕遇故鄉人
千金買嬌娃瑩瑩顏如玉不道轉喉難先學涼州曲

企喻歌

劉體仁公融

燕地買良弓秋來不離手亦知無射處可愛好弦口

當壚曲

劉梁嵩次山

十三翠袖初着地十五雙眉解人意十六當壚作家計

西門行

張壇見林錢塘

出西門步遲遲人生行樂耳富貴何為解一毋自苦自苦

將待誰少年拔劍遠遊白首不得歸解二金如粟馬如牛

有時不縱樂坐歎徒憂傷解三九州不足步思欲乘雲翔

聞闔呼不開中情誰見明解四不見昔時張子房從遊赤

松以為期不見昔時張子房從遊赤松以為期解五今日

樂相樂斗酒將盤餐白日不照地誰保千年歡解六

東平劉生歌

二首

陳維崧其年宜典

嫁女願得嫁賢豪作客願得遊臨洮頭上願得白玉搔

腰下願得大宛刀

大兄生小保門戶小弟燥髮離鄉土男兒有身力當努

焉能日與婦為伍

幽州馬客吟歌辭

二首

作人不須才作女不須好不見高樓邊碌碌兒與嫂

女兒倚門前宛轉畫蛾眉學得近關人工唱馬客辭

橋邊第一家門戶甚風華儂着綵毼戲過橋折紅花

碧玉歌

十五學梳頭綽約最風流嗔人呼碧玉揚袂上高樓

行路難

中夜起坐白晝眠終朝悉索吟可憐頗恠淳于髡滑稽

潦倒侯王筵又訝東方朔詼諧出入椒房邊客言君見

何其晚上有深碧之長天公主吹簫乃仙去緱嶺笙歌

人少年神仙亦貴能遊戲憂愁豈有昇天緣我聞此言
起自責誰令爾不憚悲歌向賓客

子夜歌

王鐸覺斯孟津

別儂經日久相見定色喜誰知相見時淚下不能止

折楊柳歌

賀裳黃公丹陽

暗藏郎馬鞭郎折楊柳枝早不砍去柳得君行路遲

吳歌

東家工刺繡西家勤紡織儂自學吳歌儂有好顏色

玉盤金巨羅上客勸儂歌不飲亦不歌凭欄看芰荷

客去阿母嗔阿母不須嗔客去自有客如儂有幾人

三婦艷

姚子莊六康歸善

大婦日多愁中婦懶梳頭小婦新粧好嬌羞半倚樓爭
看道傍樹無復可憐秋

子夜歌

吳百朋樸齋錢塘

妬殺葡萄酒忍歎勸郎醉酪酲不顧儂猶勝儂獨睡

企喻歌

丈夫不結伴飄然在原野寧饑坐上客不餓廐中馬

獨漉篇

徐倬方虎德清

獨漉獨漉越江陟陸江行傾舟陸行折軸一解控鶴吹笙

嬉遊紫庭升天路難虎豹當關二解騰蛇游霧飛龍乘雲

哀彼鳴鴈孤妻失聲三解薺亦不甘荼亦不苦大難未平

泣涕如雨四解湯湯川流載沉載浮興言宿耻誰與同讐

五 蔦蘿附松爰歷冬夏飛蓬無根飄飄中野解六日月昭
回浮雲蔽之羲和委轡六龍安施解七維澧有蘭維江有
茨蒙難偷生畏義不敢解八

春臺曲 三首

陳廷敬 說巖澤州

古臺雲日午溪口水煙昏恰到茅堂裏春風自閉門
幽人任何許朝眠紫霞室夢覺聞松風起行理瑤瑟
有客稀到門踏破碧苔色春風瑤草花聞香不會識

禽言

李世恪 共人江陵

麥枯一聲來止得萬家哭粒食絕經年刈獲飽殘腹富
人惡向耳邊啼倉穀須糶爾何為

五雜俎

巫之巒 巒蕪湖

五雜俎虎豹文往復還日月輪不獲已去從軍
五雜俎胸背花往復還駟馬車不獲已學種瓜

將進酒

燕即奉酬諸公作

曹爾堪 顧菴嘉善

將進酒深淺斟散鬱伊展素襟清尊浮綠蟻調絲裂竹
行且吟餘生幾摧挫賤子難具陳江海激浪動魂魄鯨
吞蛟怒來無因前有豺虎行路酸辛薊門策馬觀止故
人山不棄壤噓我微塵蕪城月兮西湖春追尋舊好宛
相親雲泥縱隔交自古情文披豁陶天真秋風蕭瑟塞
外來何以解愁鸚鵡杯兕觥兮金巵膾熊蹯今燔豹胎
拍手浮白不辭醉日月袞袞真足哀昔為天上星今為
曠與蠹瑤闕高寒失歸去樗齡櫟筭何有哉諸公意氣

清言初集
霄漢摩白傷衰廢髡已皤鴻飛冥冥謝尉羅對鏡長得
朱顏酡將進酒發浩歌人生不樂將如何

剪刀曲

趙潛雙白漳浦

妾心玉關頭妾影青燈畔蜀錦與吳綾先裁三五段君
衣縫已全妾衣猶未半鴉聲啼夜闌雪聲扣窗亂剪刀
欲剪愁愁堅不得斷

烏夜啼

烏夜啼啼不止三聲兩聲秋月來十聲九聲秋風起秋
風秋月無限愁散入深閨夢魂裏夢魂杳杳路漫漫隨
月隨風飄萬里萬里征人不知處東方乍白烏飛去
空城雀

朱鶴齡長孺吳江

青雀飛青林下上聲唧唧夕乳空井中朝貪野田粒不
羨玉山禾何來網羅逼豈意烈飈舉戰血淋城隅道逢
新鬼哭繞樹驚相呼空倉絕飲啄毛衣日麓踈嗟乎生
靈滿城尚枯骨况爾喙嘈安所息不見齊雲樓下火燒
天紇干凍雀飛無翼

古意

徐鈞電發吳江

歡從京口來儂向秦淮住一夜暮潮生分離不知處

讀曲歌二首

李鴻青立鄧州

聞郎入山去攜擔斧隨身再說說不信郎豈負薪人
秋湖放輕橈新手折蓮枝房中不見子苦心俱懷絲

妾薄命

胡承諾君信景陵

妾貌不如花妾命不如草草枯年一發花謝年一好可
憐妾薄命不與郎同老

夜宴曲

趙進美清止益都

北風一夜寒庭中數尺雪高堂置酒列明燭共聽飛鴻
孤影滅故人慰良夕引滿相娛樂笙歌既以陳擣蒲兼
六博飲酣請歌楊叛兒朱簾素袂何綽約獨鳥宵鳴憂
來求旦四座歡呼中聞微歎烏飛月落光迷離歌出復
止誰能知

小長干曲

王士祿西樵新城

去帆影漸殘去水無迴瀾誰憐思妾苦獨立小長干

楊白花

顧大申見山華亭

皇州二三月楊花度苑墻宮中少婦弄瑤瑟曉起捉花
長歎息一樹花飛落萬家誰人對此不咨嗟東風好吹
作浮萍昆明池外常青青

子夜歌

丘象升楚州山陽

莫去江頭望寒幃夜轉親亦知春夢幻但恐覺來顰

襄陽白銅鞮歌

朱克生秋厓寶應

折盡襄門柳長堤莫種樹大舶若歸來不放歡離去

戰城南

羅坤弘載會稽

戰城南天地昏陰風怒愁雲奔鼓聲日暮無休息戰場
熱血飛驚魂流矢亂如雪生駒嚙斷鐵壯士力拔山不
惜寶刀折今日封車騎明日封驃姚天子賞功良不薄

城南白骨如山高

拾桑葉

顧如華西嶽漢川

拾桑葉問何為田父答言桑葉可爨飼牛亦宜今年大
旱無蓄草我胡不將落葉掃田父拾滿筐小兒拾滿
兒拾已擔筐歸遲遲夜來牛肥竈煖婦子嘻行吟者負芻

秦王松

徐鯤左魚鹽官

秦王松五大夫膺帝爵離帝都寒溪無聲草木枯白鶴
來巢第一株

青青者莆

翁世庸東山錢塘

青青者莆生于寒澗君子攸悲弗顧弗盼解一大道坦坦

中心衍衍好鳥交交胡爾巢飄搖解二習習谷風吹彼幽

蘭君子所居弗邀弗盤彼狡童兮枉是用讒解三

巴渝曲三首

朱爾邁人遠海寧

約郎郎不至何處是相思灘頭有鏡架磧上見蛾眉

妾有乾啞酒酒熟烹魚鱖願郎日夜來一直到長壽

何以娛郎情海棠溪日午何以迎郎歸銅鑼復銅鼓

秋風引

馮雲驥訥生代州

秋風吹柳碎碎黃古石青莎凝白霜孤村寂寞草荒荒
草間蹲蹲伏兩狼我欲射之夜蒼茫

讀曲歌

胡文學道南鄞縣

上馬歡出門馬嘶向門外門內落啼痕

歡情誓如潮。儂獨誓如汐。寧使朝信乖。莫使夕信忒。
儂憐玉蘭花。花開謝何早。費盡一年心。博得幾日好。
淚如許。簷雨語石。堦滴滴。只到汝。

看歡髮到趾。是處儂所識。今夜不辨歡。歡背燈光立。

大堤曲

李天馥 容齋 永城

堤上春光好。絲絲楊柳晴。誰家遊冶子。隔樹打流鶯。

子夜吳歌

林佳璣 衡者 莆田

採蓮鏡湖裏。羞見菡萏花。薄命妾自恐。畏人吳王家。回舟明月上。惆悵滿若耶。

團扇詞

李贊元 素園 龍溪

篋中白團扇。夏來親。郎面願。天不復。秋長與郎相見。

讀曲歌二首

曾異撰 弗人 侯官

奈何許。祈雨燒猴猪。活活為晴歎。

昨日與歡約。許我不見來。雙足共隻履。只有一半鞵。

子夜歌

黃元垓 辛子 海澄

郎為芙蓉花。妾是薜蘿草。芙蓉着紅時。薜蘿春已老。

西門行

董含 榕菴 華亭

出西門。心孔悲。人生務快意。富貴安知。夫白日。晡晚

不可追。胡為朝。籌暮筭。黃金滿籬。為。鹿。廣。厦。薦。華。茵。

子女二十餘。結婚多貴人。為歡止一已。遑顧他人。嗔

炙手曾幾何。身歿家亦貧。當年石家擅豪奢。白首同

盡古所聞。當年石家擅豪奢。白首同盡古所聞。五但得

尊有酒對客時時傾百年若朝露莫憂後世名

六解

子夜歌

孫

適太貞錢塘

歡出不思歸似欲他鄉老何不共携儂他鄉應更好

楚黃耳

陳增新

子更嘉善

楚黃耳何狂獠昔吠堯聲信信附彼黔驢宅躑躅三輔

五陵解一念饑欲歛化為鞞上鷹金眸鐵爪擇肉恣騫騰

解二鷹一變變雀鼠敖倉洛害不足飫豐澤毛羽壯哉雀

鼠解三糠耶糝耶見而怒耶捕者隨其後張之羅列之炬

請君赴刀俎嗚呼弘羊烹天乃雨解四

公莫舞

陳維岱

魯望宜興

秦失其鹿天下共逐赤龍矯矯獨捷足一朝入咸陽閉

關約法留三章沐猴聞之勃然怒龍為肉兮猴為俎操

刀不割失利期亞父召公拔劍舞吁嗟乎公莫舞赤龍

有劍斬白蛇公乎舞劍非其伍

子夜歌

二首

李楷

河濱溼陽

日前雙影來月下雙魂去自是歡同心與歡常一處

歡是一目魚儂是一目魚目雖分左右兩兩好同居

河中女

二首

吳

翹松巖吳江

小小河中女十二能當杼為說鵲填河低頭不言語

織綺河中女客來便投杼不曉客云何莫是冰人語

妾薄命

蔣

墳寅升武進

妾薄命歸休矣為婦不生男寂寞身後事楊柳何蕭蕭

迎新亦須蚤送我出遠道心魂日已稿何得復嚙嚙親
君一醍醐樽前跪弱女嬰下啼老姑

感秋吟

許之溥 庶菴 武進

風動蘋起雲光在水荇藻有心清我眸子白露在衣秋
心易微寇兮珮兮君子當饑

估客樂 二首

董說 月函 湖州

烏啼江月落遙村隔煙嶼天寒津鼓澀行人霧中語
送歡楊柳灣帆轉不知處不及嶺頭雲隨歡千里去

悲歌

錢澄之 欽光 桐城

廉吏不官近地貪吏不歛獄中朱鑿得氣神于應龍西
伯囚羨里烹醢終不免有錢通鬼神雷霆車輪轉

平陵東

程淞 婁東 山陽

平陵東誰最雄父為丞相子侍中男尚長公主女弟擅
後宮甲第連雲起車騎如游龍腴田徧鄆杜黃金埒司
農衣奴火浣布醉客琥珀鍾藏中無名錢纍纍如列墉
腰間七首劍燁燁垂長虹破壁藏翁伯司隸不敢蹤一
言不稱意咤叱忽生風寧知青陵上千古賢愚同

晨昏歌

陸朝瑛 石齋 無錫

日之晨禮佛香闈裏手未釋菩提低頭整織履
月當昏粧卸梳新潤插花看未葺眠猶伴雲鬢

鳳凰曲

沈謙 去於 錢塘

弄玉配蕭史鳳凰待佳人非千秋別曲傳天下春綵

雲無餘影臺迹在西秦

李夫人歌

人乎仙乎望而就焉靈何紛紛其不前

擬狎邪古艷曲

張莊山農膠州

所歡久別離軍勤拜都護青樓感歲遲嫁作廝養姬親見朝謁歸金鞍燭通路背立下踈簾願歡不廻顧

哀流民

康若生上若安福

流民自北來相將南去問南去何處言亦不知處日暮荒祠淚下如雨解一饑食草根草根春不生單衣曝背雨雪少晴解二老穉尪羸喘不及喙壯男腹雖饑尙堪負戴早春糧夕牧馬姬幸哀憐許宿茅簷下解三主人自外至

長鞭驅走東家誤留旗下人殺戮流亡禍及鷄狗日淒

淒風破肘流民掩泣主人搖手解四

臨高臺

李昌祚來園漢陽

臨高臺以南北風吹號日將殘鳳凰擇木下有深淵獺逝我梁遊魚不敢前越人關弓怒挾雙丸獻壽君王某傳遠之臣義不敢安

讀史詩二首

馮溥易齋益都

參相齊善黃老蓋公既舍獄市不擾賓客言事得醇酒後園歌呼吏何有甯歸欲諫丞相嗔天子安用欽四鄰惜哉孝惠乃不振

通小臣戲殿上天子親爲謝丞相臣節存絕私門絕私

門朝廷尊功名著否真帝恩

銅雀怨

辰 玲 露森 錢塘

築臺臺高飼鵲鵲肥鵲肥怒飛不能起夜半春深雜吳
語臺下草荒臺上雨長安小兒截管吹東山精舍成幾
時

子夜秋歌

冒 襄 辟疆 如臯

婆娑桂樹枝馥郁桂花子香飄到曲房助郎小歡喜

孤女吟

申涵光 息盟 永年

受君執素報君醴酒爾時雖未入君房心知為君婦君
行出賈朝出暮歸今者不返十年空復啼巖風下推百
草世事反復何足道孤女空居恨不速老

青萍港

吳嘉紀 野人 海門

青萍港樹翳翳野煙入河河水黑來船去船樹根繫人
家門開鵝鴨歸酒店月出藤蘿細模糊缸底釀鮮新網
來鱖村無盜賊客有錢買君一醉高枕眠

貧民謠

王崇簡 敬哉 宛平

盛世矜窮黎前月府帖下朝夕望賑來中道聞歇馬馬
疲固堪惜民已多歎者

邑令謠

貧民喜得賑猶可三日飫邑令苦供應惟祈使者恕貧
民望速來邑令望速去

三婦艷

許孫荃 生洲 合肥

清言不身
大婦織雙燕中婦繡鴛鴦小婦愛宜男鬪草不成粧土
客且安坐春色滿華堂

鏡歌鼓吹

項景襄 眉山仁和人

聖朝用兵緣救民民安兵戢賴良臣廟筭果能周紫塞
戰場何必有青燐繫白馬繫黃巾赤眉至暴易以仁前
軍大旗裂作衣朱雀橫被戍士身雨雪遠楊柳新歸來
飲至當仲春錫爾文卣宣玉綸礪山帶川祚永申不重
將軍功重爾成功不曾多殺人

舞劍曲

王承時 象先麻城人

拔劍為君舞舞罷淚如雨非為試劍難却緣按劍苦
公無渡河

河水深河水長公若渡之河水茫茫欲渡不渡公心張
皇我思公張皇我心慘傷

君馬黃

侯方域 朝宗商丘人

君馬黃臣馬驪驪黃各異種種種出遼西 一解 臣馬驪君
馬黃子馳我驅從狩無荒 二解 驪耶黃耶來何賒蹄有血
痕鬃有沙 三解

敲蓮子歌

熊人霖 伯甘南昌人

敲蓮敲蓮朝百暮千敲的敲的朝千暮百的蓮光光携
我鞵筐笑上高堂進我翁孃客來可嘗孃云客乃阿女
郎蒙羞遮面獨回房

精衛操

汪琬 純菴長洲人

愚公既移山精衛亦填海石泐木易枯所志終不改口
穿羽折君莫嗤君不見海波亦有揚塵時

覆巢行

空城生高枝黃雀銜將歸巢成身已歿雀雛苦無依風
雨來何數巢中泥水濁泥水濁雛抱殼啾啾聲不樂羣
雀卽相欺豈竢烏鳶啄

擬古歌二首

陸求可

密菴山陽

蘇季子舌無比不得指放歸里饑欲歿妻孥面目尚如
此
范大夫智傾吳挾彼姝掃姑蘓泛五湖縱有烏喙焉噬
吾

枯魚歌河泣

王

暉

丹麓仁和

枯魚過河泣網罟何太密大魚吞啗盡鰕鮒皆戰慄蛟
龍詎所安泥中破浪出

當來日大難

日苦短樂未央初發玉釭蒲桃香連親故宴華堂左列
趙女右坐秦娥既調絲竹亦奏雅歌靈藥難期朱顏易
衰人壽幾何不樂胡爲

七夕謠

龔百朋

升璐武進

牽牛織女吾將語汝乞巧不須多天助一朝雨

築黃河曲

王

鑑

大愚孟津

築河先築人築人先築我只將黃河水變作中原火

安東平 二首

博山滿藝要即誓說高高在上對此明月
報儂玉環以慰離別終始相連回還不絕

雙行纏

方來 脫菴
潛江

雙行纏可憐足跌如春妍千縑萬痛阿母前儂墮幾年
淚得成一葉蓮博歡一聲憐

襄陽蹋銅鞮 二首

王光承 玠右
上海

襄陽白銅鞮玉勒黃金羈馬前何纍纍揚州遊冶兒
官從襄陽來最愛襄陽馬金刀笑少年承恩雙闕下

懊儂曲

劉霖恆 沛立
無錫

人言種花好花開使人惱花下兩鴛鴦鴛鴦是何鳥

公無渡河

王抃 憐民
太倉

公無渡河公渡河公渡河即溺歎何不欲渡還復止平
川風波尚足畏况廣河之奔流千萬里是以賢達人退
以保其身魯連既遺燕將書不願富貴蹈海濱子房借
箸定天下從赤松子遊白雲之深處不復問當世之為
漢與為秦古來豪傑盡如此眼前得喪安足論柰何儒
生輩爭區區蝸角之浮名君不見上蔡犬華亭鶴昔時
聲華何爍爍一朝追悔良可悲相秦人洛終奚為吁嗟
平箜篌曲空復哀世無劉參軍誰為荷鍾埋世無陶彭
澤誰吟歸去來箜篌曲空復哀

白紵舞歌 二首

邵長蘅 子湘
武進

美人鳴環出洞房。靡顏膩理。蘭氣芳曼。睽娛視騰。清光
華。桂飛綃。風花香灼。如芙蓉。濯金須臾。逸態變無方。
似留忽往。驚鴻翔齊聲。合體歌遠。梁織縠。蛾飛從空揚。
整軀遞進。屬羽觴。遺簪墮珥。樂未央。

三星灼灼沉絳河。明月宛轉流金波。蘭膏蠟炬。鎧九華。
美人起舞朱顏酡。玉腕雙舉垂纖羅。皎如太陽升朝霞。
工態善變巧笑。佞丹唇一轉。發揚荷秦箏。趙瑟鳴相和。
流目聯視。卻復前揄袂。翳面不敢言。迴裾一笑君自憐。

地驅樂歌

沈漢方舟

梅花春開夏來結果。嬾不嫁翁那得生我。

隴頭角吟

最恨隴頭水。瀏瀏日夜生。何人吹畫角。併作斷腸聲。

團扇郎

團扇搖如月。是郎親所寄。感郎恩意深。未忍輕拋棄。

江南曲

綦汝舟南箕

採蓮蕩雙槳。秋風蓮子香。如何儂孽處。多半是空房。

觀荷華

林堯英潘亭

橫塘五月荷田田。朱魚潑刺戲其間。蔣葉荇帶相迴旋。
相迴旋。影凌亂。摘華歸絲不斷。

烏夜啼

梁允植治瀨

慈烏夜啞啞。哀鳴意良苦。一烏訊其由。烏言失吾母。吾
母真慈烏。高深德難數。為子營巢居。綢繆徹桑土。為子

防鴟鴞恩勤禦外侮聞予聲啾啾推心置肺腑喜子羽
毛豐遷枝教飛舞方爲返哺行秋風空恃怙未酌鞠育
恩無以慊仰俯故爲啞啞啼深夜注如雨

倚柱操 三首

袁佑 杜少東明

國無憂兮人心和縱守空房兮樂如何

憂國之人兮非予所憂國無人憂兮予寧不憂悲而嘯
兮予何求

悲而嘯兮予何求隣不鑒予衷兮維予之羞

鄱陽曲 二首

張養重 虞山陽

君似三板船儂似鄱陽湖君行日東西留儂伴大姑
船自出江去儂只在鄱陽君若向小姑儂不近康郎

當壚曲 二首

俞南史 鹿林吳江

十五卽當壚門前映楊柳白面誰家郎勒馬頻回首
入門索酒嘗非是貪醯醢含笑工數錢上下看不足

楊白花

丁煒 鴈水晉江

楊白花飛來飛去落誰家春風不住花無力吹入西園
無舊識昨夜東墻桃李枝暗中相別未相知還借春風
頻寄語相憶長如未別時

採蓮曲

于穎 息庵金壇

採取並頭蓮笑向鄰舟語照水比容粧可似儂與汝

月中詞

堵廷葵 芬木無錫

月滿月憐人月暗人憐月不作可憐人任他圓與缺

採蓮曲

董俞 蒼水華亭

南浦輕雲白鷺飛，蘭橈桂楫乘月歸。荷殘藕折香滿衣，
香滿衣。櫂歌起，清風來，落蓮子。

吳歎

孫蕙 樹百蒲川

樓間瑟瑟秋，樓上盈盈女。簾外注秋波，低聲歌白紵。

短歌行

羅人琮 紫蘿桃源

思祛憂兮忽未樂，其來無端焉所託。松風起雲兩角夏，
虫鳴夜索漠。今當誰語古不作地自厚，天自高。或踟躕
或翱翔呼濁酒，耶復歌三萬六千日。君如輕擲柰君何。

斫鏡歌

施譽 砥園宣城

逸馬尚可收，風鳶尚可逐。郎心在方寸，一失不可得。

將進酒

莊同生 澹菴武進

將進酒，吹笙竽烹鮮。擊肥出中厨，金鏤椀翠羽。卮間以
白玉，繚紹之履烏。交錯屬所私，一日千秋與等期。在世
不歌復不飲，蘭草須同衆草萎。

枯魚過河泣

江闔 維荀新貴

枯魚過河泣，濁流未可入。莫更託清流，河干有獺立。

採蓮曲 二首

顧九錫 臨邢江都

採蓮採蓮日暮歸，荷葉荷花露氣微。輕輕蘭槳蕩餘暉，
蕩餘暉。腕力綿腕力綿，整翠鈿。

採蓮採蓮月已生，清光影影綠波平。無那吳歌口自吟，
口自吟。忽然止忽然止，鴛鴦起。

子夜四時歌

何 絜 雍南丹徒

一夜西風吹惻惻念游子低頭停剪刀不欲裁羅綺

饑民謠

程 封 石門江夏

去年數米饑今年突無煙去年併日食今年咽糠覈糠覈猶自可縣官租稅還逼我

洋嶼尋梅

周廷鑑 元立晉江

天海競靈廼展孤嶼此納遐淵元化在佇石戶不扇雲松迭舉光香來賓澄神燕處

還山吟

張 適 鶴民嘉定

入空谷慎幽獨石上弄流泉山頭抱黃犢違時嘯傲臥煙雲避世行吟友麋鹿

子夜歌

周季琬 文夏宜典

春風來花間舞香香不已左有綠玉琴右有錦囊史自問何所歡物物無一是

江南曲

蔣 柑 甘來長洲

春風兩岸明潮回滿江綠連檣估客船清謳月中宿瞳矓指潤州渡口人煙簇雲開山樹樓閣深曉鐘遙落翠微音此時年少風波客忽起江湖離別心

芳樹

李以籍 聲叔漢陽

語芳草芳草不如故含情終待誰更復語芳樹芳樹離離開野花花枝零亂花葉斜晴春空不采風雨羨他家

青谿小姑曲

魏 憲 惟度福清

小姑獨棲在彼清谿。風吹芳草。日暮凄凄。

古意 二首

顧 樵 樵水 吳江

林木雖榮日尋斧柯。江湖雖深網罟日多。榮木已絕。澤魚已竭。雖有機巧。將何施設。

惟彼多財。懷寶喪身。惟彼貧人。饑寒不生。生民有欲。誰其樂歎。不慮求生。慮不畏歎。

歡好曲

東蔭商 雲雅 華陰

小姑作新婦。三日來歸我阿嫂。低相挑。雙頰赤如火。

猛虎行

翁聲業 鶴丹 錢塘

山深月黑風號林。猛虎磨牙思噉人。子何夜行櫻其噴。云家有吏夜守門。追逋如火憂心焚。鷄豚鬻盡將兒孫。

不忍老年見生別。寧撫瘦骨為虎吞。同是猛虎此有冠。有冠不可寬。騶虞見之徒心酸。同是猛虎此有翼。不可測。狡狴見之亦變色。行乎行乎。擇害莫若輕倖脫。虎吻留餘生。

自君之出矣

謝良琦 獻菴 全州

自君之出矣。日日計歸程。常恐風雨至。不聞車馬聲。

玉階怨

陸壽名 處實 長州

捲簾拜新月。熠燿流梧桐。人言忘憂草。不生昭陽宮。

白紵舞歌

李 焯 格齋 嘉善

璇宮夜靜月舒光。美人如花嬌北堂。蘭缸沉沉漏未央。飄如白雲來無方。宛若飛鵠雙迴翔。停眸善睐幽思長。

將迎若遠意莫量搖搖徽袿飛仙裳風迴雪轉凝清香
荅桴應節度笙簧宛轉梁塵客斷腸持情向君君莫忘
千金顧笑爭年芳

安東平

張仁熙長人廣濟

天寒難明饑人起立鷄鳴亂松風吹雨急解一牀頭取薪
為郎炙酒長薪尺餘展轉勞苦解二願郎且歡郎歸百年

解三

禽言

得過且過毛羽匪新皮肉猶故

獨漉篇

蔣玉立亭彥嘉善

獨漉獨漉汙泥側足振衣千仞景彼芳躅解一洪波奔趨

源清流別汶汶者誰知幾則察解二水深浪惡欲渡無梁

芳洲杜若難以褰裳解三鰕鮒小虫啖唼泥沙龍乘雲氣

湖海為家解四劍沉深淵珠混魚目物失其所哲士改服

解五濯纓滄浪孰不移情流覽川上身高道尊解六

東武吟

顧景星黃公蕪州

出東門遵長途遠望見何紛拏青衫紫駟依路隅高鞞
白帟窮錙銖鐵襠銅鞮金僕姑踰垣截砦爭封侯東家
上計西家囚頭上白日根株人生少壯雙轆轤謂君亦
何愚君不見魏有吳起吳有要離室中彼妹不得為妻
遵長途摻子祛

料絲寶鼎燈歌二首

何采損齋桐城

殿宮出寶鼎霍霍輝虬螭六十四珠果羅列充金匱下
有翡翠壺縱橫交插珊瑚枝珊瑚枝挂明月碧甃璇題
借顏色疑懸繩甕光轉蝕
奕奕復奕奕照見滿堂客七襄緯出天孫機五色煉同
女媧石鎔將香粳凝綵液九華一枝黍千粒君不見老
農倚鋤望離畢

鳳笙曲

陸進蓋思餘杭

雲鬢霧縠薜澤生。纖纖柔指學吹笙。朱唇宛轉翔鳳鳴
翔鳳鳴繞虹梁。歌窈窕何清揚。

子夜歌

高詠阮懷宣城

寫恨桑葉上。持向春蠶飼。吐絲織流黃。盡作相思字。

折楊柳歌辭二首

拗得楊柳枝驅馬燕山下道傍行客兒誰知心獨苦
楊柳復楊柳豈堪作馬鞭隴頭楊柳盡健兒還戍邊

自君之出矣

譚篆灌村景陵

自君之出矣。紅葉委東流。無那桐梢月。邀人上翠樓。

艾如張

李澄蒿菴典化

艾而張羅空城之下城上烏鳴啞啞黃雀辭其巢鼓翼
啄粟來廣野噫噦吁黃雀朝猶跳跟暮燔灸汝不見鴻
鵠時時避繳矰千里高飛向寥廓

東飛伯勞歌

趙澐山子吳江

鷓鴣啼吳鴈啼蜀燕娟蘿女翩相逐誰家玉質隱蘭堂

艷歌一曲度清商。丹綃華幄彩雲動。綠麝花單明月夢。
韶光女兒正三五。豈蕊春梢不似吐。聲聲羯鼓亂催花。
淚落紅冰帶雪沙。

君馬黃

丘象隨

西軒山陽

君馬黃臣馬白朝以南暮以北前徑狹邪不容車水淡
泥濁齊馬腹君王莫信八駿足回鑣曲巷多顛覆萬年
但願居黃屋南貢包茅北獻鹿

古琴銘

張鵬翮

運青潼川

天池鴈足德音斷續

太平役者

王又旦

幼華邵陽

疾趨者干搗戴乃笠皤乃腹乃集于太平之口
解一乃集

于口憒憒不息吾見其作不見其食汀沙為藉江水為

糜天高無雲白日炙之吾聞人不再食則饑
解二江水來

江水來水來無期前日平岸今日上陂慎而隄防秋種

猶時而無遊嬉
解三惟勤則力惟勅斯嗟勅勤不齊眾口

何多我不而迫豈無室家感子之無諱
解四

烏生八九子

李念慈

勅菴涇陽

舍旁日高啞啞鳴老烏樹頭養雛成跳枝啄屋尾畢逋
騰高及遠毛羽輕老烏亦勞止幸且居巢裏雖有八九
雛一雛獨辛苦思哺老烏雨潦載塗泥不可啄日暮安
徂西飛江漢東海隅南山豆落北麥枯翅垂力盡繞枝
噉老烏苦饑烏子心悲

隄上謠二首

誰游此水人稻魚誰為此水黃淮湖
死者漂生者臥不死不生隄下坐

汪楫舟次休寧

艾如張

芟蓼抽棘網彌深陷禽者虞陷虞者心陷于虞猶可脫
陷于心不可活

黃道開屺書漢陽

江南曲

迢迢行萬里遊子心惻惻日暮江南船不渡空囊客

單虬昭余蕭山

蠅蟲

一身兩口今爭齧自裂一臣兩心今國破身滅

顧伯宿鍾星吳江

悲歌二首

廉士可以謝客俠士可以作家不大不小非龍非蛇
人不至壁立脫粟徒傷心人不能殺人誰肯遺黃金

惲向香山武進

補香羅

補香羅且摩挲織縑織素手如何會向鮫人眼裏過刺

劉肇國所仙潛江

繡倚門爭幾多酥酪細嘗分膾炙琵琶斜抱上明駝風
塵閨閣渾無定縱有相思不敢歌幸得免補香羅

兄妹行

魏閎各閩漢川

髮委地髯如虬二張兄妹英雄尤紫衣素面拜五夜輪
局勉策挾餘馬圖夫圖王心各寫州將子尸居氣瀛州
士兮巾幗類嫁不嫁犬即嫁鷄世上豈無代龍兒暗鳴
歌騅智何劣預走豈無扶餘國

婕妤怨

潘永祚 太丘上虞

一自歸長信宵宵近廣寒昭陽雖有月難得盡情看

園

嚴首昇 平子華容

園蔭于樹舟不容池我茨既塗竹生不遲微君之故焉

取于斯

登高丘而望遠海

毛會建 子霞武進

我登高丘思與仙人遊我望遠海仙人又安在秦皇歿

後乃有漢皇采藥神山使者相望君不見驪山陵楚王

開後牧豎登又不見茂陵客廢穴今多礪劍石

雜詩

李何煒 緩山沔陽

蔡經背癢迺更得鞭麻姑不怒彼猶少年

禽言 二首

胡從中 師虞山陽

蠶絲一百箔四月已賣却穀種二十鍾時雨三四勺富

家追呼天災下索官府青苗不肯錯力作力作多苦少

樂

得過且過行止坐臥禍福依倚日月在磨轉盼繁華一

餉時醉飽傷人不如餓得過且過

短歌行

丘元武 慎清諸城

和壁走四方所寶非所產知人良不易牴牾豈在遠太

息齊公子結客驕鳴珂黃鵠一舉六翮去毳毛鍛羽何

其多風流雲散冷溜水請君且聽松栢歌

楊白花

范文成 符祥符

楊白花花生廣陌飛入房櫳間輕點思婦額昨見楊花青
今見楊花白楊花猶向淡閨飛征夫行行去不歸

擬陌上桑

張希良石虹黃安

吳地桑蠶遲四月未成絲今朝見少女提筐採葉光離

離髮短蓬飛脚不襪倚樹淚交頤一問女何所悲女亦

無所悲官家蠶苦早田家蠶苦遲採桑不盈掬已從二

月賣新絲二為女謂蠶勿食桑願復化為高辛之帝馬

悲鳴奮躍吞蠻方催科不煩征戰息捲女上樹樂洋洋

三解

雜詩二首

劉友光杜三攸縣

棗雖甜藏于棘妾心耐苦不采其實

惟其棘矣雖饒適口人不忍饑或忘其手

車遙遙篇

曹鑑平掌公嘉善

車遙遙馬駢駢送君上計西入秦道傍細草柔如茵車

輪日轉黃塵裏願為黃塵逐車起得着君衣衣化縑

艷歌何嘗行

顧瑛美輝六嘉善

何嘗快且翱翔但當策駿馬飛羽觴一祖父官至萬石

兄弟納貲俱為郎二結交王侯中貴呼盧縱飲不惜黃

金聲勢燠赫驚道傍三又當多置別館飾以珠寶挾使

燕趙名娼四人取適意何用低昂笑彼腐儒髮短憂長

五植禾須殺草求賢莫聽讒錢刀為朋友古人嘗汗顏

宛洛多甲第出入俱達官昨日歌舞堂上今日瓦礫草

間不如徒步采藥登商山樂盤桓

歸風送遠操

奚祿詒蕪嶺黃岡

成帝太液池玉作合宮舟宮人雲英裙寶瑟間篳篥解一

中流波浪迴石燕搏扶搖行雲復行雨飛入開襟樓解二

御帝巧呢喃無方倚洞簫翩翩掌中舞寵與趙妃伴解三

秋至不周風梁傾玳瑁巢碧璫綃作歛送葬黃花溝解四

黃花成茂草牛羊居上頭至今行道人掩鼻過蓬丘解五

前池老父母化作白文龜延年傾國歌淒絕聽者愁解六

定情歌

霜雪葦今春又深衆鳥求今萬木繁物勝人兮涕泗零
思美人兮何無情

日出入

魏學渠子存嘉善

日出入出扶桑入細柳誰耶能知其紐故景南多暑景
北多寒景夕多風景朝多陰驂六螭以遨遊萬古無停
馭晨光下地夕安識宿處爲我謂日何不休息行健致
泰平長世時萬億

鄉土謠

沈隆卿公挹烏程

棟花飄野雲白吳綃他日盈刀尺

懊儂歌

蔣漢紀波澄會稽

髮雲斜燈花墜歡不來儂先睡好夢成鴛鴦配落花風
驚魂碎

幽澗泉

史惟圓雲甬宜興

幽澗泉何潺湲。坐客請勿諠。聽我揮素絃。何必見文王。
黜然而黑。幽然長。昔我東海遊。刺船訪瀛洲。吾師方子
春。金徽陳上頭。令我長跪受。此曲此曲能消萬古愁。我
今一彈還再鼓。有亂石齒齒。曲水漣漣。寫此清音以娛
四筵。幽澗泉何潺湲。

猛虎行

徐象麟 蒼郊
鄞縣

北山虎朝饑。南山虎夜出。得人未肯止。羊豕安足恤。老
農若廢耕。祀卜無虛日。神不如虎。虎更驕。農如虎何鬚
難撩。

子夜歌

蔣玠 絢臣
侯官

歡未知儂心。但看堦前草。腐化作流螢。微光尚相照。

黃鵠曲

唐宇昭 孔明
武進

黃鵠本小鳥。奮身飛千里。願學黃鵠飛。千里時飛向君
前。時飛向君。後時飛向君。左時飛向君。右

於忽操

林之華 果存
黃岡

於忽乎。不可以為其。又奚為。魚蝦離水澤。兮安歸。蛟龍
失雲氣。兮安依。玉鵠列樹。黃雀盈畦。金丸不在手。利器
已失時。毛髮容易變。那得待斯須。登高山。涉大谿。僕夫
况瘁。眼迷離。既東望。復向西。天涯寥濶。道路倭遲。美人
隔絕。寄書稀。晝苦短。夜苦長。磨舊墨。見新光。齊統百尺
寫清狂。勸君莫謀田宅。謀美酒。待我歸時。煮肥羊。

艾如張

陳寶鑰 綠厓
晉江

正月買新麥磨作長生麵五月購新絲結成續命線時
夜與鴉炙未免失其便豈知三年艾辟兵反為召兵扇
辟兵不若止殺機蘭艾何妨同時賤草木穰穰無械心
芳臭不言仁義見君不聞主兵仁為先主財義為善不
仁主兵賊之魁不義主財盜之變

蜘蛛歎

馮昶世 東臨華亭

蜘蛛結網羅腹小經緯多網羅語蚊蚋前路大轆軻

艷歌

魯 釗 桐聲武進

曉起綠牕髻百昌吐香風鏡中楊柳色復照青樽中

子夜春歌

汪 灝 素臣山陽

柳色弄新黃偏惹流鶯任何人躍馬來折向章臺路

斗天歌

劉 城 伯宗貴池

彼何人斯昔介而馳殺人如飴今端冕而坐殺人如飴
一解彼何人斯昔我詈之曰賊彼殺我有克不克今跪拜
之曰官我不敢仰視彼殺我無不得二解我昔餽餉戎士
往與渠搏今直餽餉渠省我艱難雖省我艱難我心則
慚三解我今餽餉渠憐而活我我乍猶可操刀如昨膾人
肝如酪戰艦大作弓矢鏃爍硝黃日夜合天乎天乎謀
國者那四解

渡沙河曲

馮夢龍 猶龍長洲

渡沙河風來面如割酒味不求加添錢但添熱

大滌吟

牛 魚 潛子長治

石乳狀猶龍鱗鬣宛飛動上石則無情拏雲勢如控嗟
乎天地所爲本無而有世間何物不成器化工撰造可
知已

行路難

蔣 鑰玉淵
武進

我欲煮銅山虎狼日爲怒我欲採珠淵鼉鼉不可渡肆
睇以芴皇白雲天一方上客停車解余意謂言惻惻力
力山高而水長欲往從之祇自傷提刀重拂拭起席爲
我舞雪花冰鏢生蛟螭公孫大娘遠遊之縱橫飄忽不
當意神氣會合自有時君莫舞我且歌歌宛轉聲嗚嗚
何必長鞭爨下桐何須擊碎紅珊瑚願言努力還歸故
鄉行路難莫行路

清詩初集卷之二

武進蔣 鑰玉淵

錢塘翁介眉武原 選

涇陽李念慈劬菴

錢塘汪 霽韞石

金壇呂祚德大坯

靈壽傅燮詞去異 定

五言古

過石曰湖

施閏章 愚山
宣城

征途遵石曰停橈傍陰壑霰集林臬疎潦收浦激涸菰
蒲冒清淺魚鱉鬱蕭索颺颺商飈來嗷嗷羣鷺落臨集
復回翔悲鳴避矰繳中澤暗張羅殺機難可脫勞生害
水族人物兩索寞黃鵠獨高飛矯翼何寥廓

琴溪

丹巘臨清溪飛梁冠殘霧古有馭風人策鯁騁高步騰
身得所歸滅跡不回顧繼鱗蕩春波幽花耀寒樹嫵媛
女蘿深迷離仙隱處逝矣聖者懷樂哉濠叟趣道傍者
誰子矯首有餘慕

憶昔

憶昔宿逆旅通晨眠未醒猶憎主人聒張燈喚客行中
年見衰耗朝昏集百情夜闌甫宴息未曉如有營寒月
皎在戶顧謂東方明高聲促僮僕爾不聞鷄鳴馬力既
已竭畏塗仍宵征道逢濠上叟笑我勞此生桑榆不可
待輟駕且歸耕

登萊州望海樓

李念慈

幼庵
涇陽

東海濶無極積流涵八荒不知天水外曠莽是何鄉浩
淼幻潮汐汨沒變青蒼浮天含萬有浴日騰初陽十洲
在何許扶桑幾歲長但見芙蓉山泛泛臨我觴遠瞻遼
水碧如靚歸鶴翔蜃颺三冬伏天吳白晝藏求藥想漢
帝勒石紀秦皇斯人皆已矣吾意正蒼茫

大澤山觀日出

杖藜犯清曉東上摩雲堆噉足緣石脚滑屐凌枯荻登
危愁盡力十步一徘徊月寒松影靜日出滄波開火輪
橫千里殷起三山隈陰陽相吞吐汨沒雲濤迴倏忽騰
虛碧天宇一何恢崢嶸赤霞下微茫見蓬萊會當延未

光覽輝臨八垓

寓園

杜濬茶村黃岡

暫歸不得息復來叩園荆掃榻恣偃仰深綠怡我情假寐遂成夢夢醒聞流鶯為時已中伏宛作春曉聲奈何雀與烏努力方爭鳴眾雀既嘈雜羣鳥尤豪橫坐令好音阻側耳不分明三歎推枕起仰視天宇行

送王阮亭北上

淮水揚洪波中有沙棠舟借問將焉之北行到幽州秋風何習習秋雨何淅淅睽彼舟中人於我交綢繆方當來作理子適過邗溝官廉忍分俸自笑子何求干請誠則拙談藝固其優感君適野性飲啄勤相周送酒必絕品推食必精饌勝境必我招佳句必我投燠時貽我葛寒時貽我裘記逢人日雪造我吟窮愁豈獨棄案牘居然忘貴游人生意氣合豈在千金酬揮手送君去此義今悠悠

登盤山

梁清標蒼巖真定

清曉發薊門盤山近在目引馬憑老僧迤邐迷磴曲山根亂石橫澄泉瀉川麓古松勢蚪蟠春鳥鳴灌木窈窕開石樓僧徒隱石屋下馬坐高巖宛轉清霽覆俛首瞰平原蒼莽極遙矚桃李媚幽谿煙皋布新綠天風吹我裳拂拂來芳郁頓令塵慮消良覺素懷足何事慕蓬丘采真徒僕僕裴回不能歸長嘯振林谷

秋日

達人貴知幾君子能俟命人生苦勞勞紛華疇戰勝閑
居懷古人蕭然寬營競皎皎明月光照我書幃淨夜清
星河垂庭幽花木靚謝客百慮忘適符麋鹿性靜觀識
盈虛忼慨發孤詠逝將驅車歸故園禾黍盛寄語長鬚
奴爲我除三徑

幽蘭歎

灼灼桃李花恣態一何穠向日倚檻開欣欣爭敷榮遊
騎時喧闐壺觴相對傾爛熳映一時沾醉意氣盈嗟彼
幽谷蘭寂寥挺孤英芳華聊自賞巖霜任飄零雨露豈
有私托根實不同冷落雖足傷安敢移堅貞

季夏二首

王崇簡敬哉宛平

默念懺前非一蟬鳴亭午蝴蝶大如掌簾外復栩栩物
化無停機推遷歎今古流雲戀深林開卷坐前廡暑雨
忽澄霽涼颼滿庭戶

明霞耀空碧纖雲依老木朱炎化微涼筍席秋先肅事
往愧多悔感物悲易逐浮生已殘夢無求卽遐福池邊
藕葉香亭亭娟幽獨

田居詩二首

吳懋謙六益華亭

伊余寡世姿繇來慕長吟清風陶纖月皎皎盈我襟固
窮安天道丘壑良夙心破廬多頽垣屢空尚鳴琴四面
周遠山栝栢樹前林嘉魚躍圓波高鳥弄清音野色日

暮佳牛羊來碧潯爵祿無常位美服進荒淫傷哉今古
慮濁醪且自斟

吾生如浮雲孤踪邈無托幸有舊田廬聊以供耕作十
畝播時苗五畝藝靈藥秫熟既環陂蘭生亦遶壑釀秫
且盈甕有酒不蕭索雨餘雲氣清飛鴈鳴川薄居此頗
有年俯仰兩無忤披榛刈蕪草矯首視寥廓笑詠滄浪
歌閒從漁父謔本愛沮溺翁庶幾平生約

詠懷

龔鼎孳芝麓合肥

神龍無定跡文禽恣遐翔繁英各嫵媚寶此孤蘭芳山
澤苟有托富貴理可忘薜荔裁我衣葵藿充我腸青霞
開松牖丹竈森芝房濯纓萬里流晞髮千峰陽顧視塵

中子戚促誠閔傷

過杜于皇饑鳳軒

廣陌散蒼煙高齋下涼日嘉晨惜晷短爛熳秋燈出清
歡無節緒盤飧雜紙筆酌苦方及唇拊牀恰平膝地偏
耽卜夜明晦理仍一棲棲眷林鳥安用歸飛疾

周鄧山錄別和劉公猷比部松下飲酒

浮雲散長坂白日何皚皚聞當遠行游層城澹晴暉別
離豈不苦羨子先還歸駐馬立高原塞鴈參差飛回首
松間樽歌呼安可追

夜坐

申涵光鳧盟廣平

積雨晦深巷高梧滴清響浩然天地間秋風生餘想夙

清言初集
昔寡疑慮萬事如在掌多難志氣衰歲月空俛仰含辛
對落葉朋遊半宿莽常愧古人言識道年已長出門望
四方道路多魍魎白鴈叫霜空孤燈照書幌

淹留

淹留慰僮僕窮途久依倚苦樂豈能均人事聽原委性
僻耻雷同百折心未死我有親在堂我有田在里清白
舊家道艱難渡江水冠蓋接長干山寺守糠粃汝各有
妻孥悞汝良自耻海沸困魚龍中原方戰壘饑凍塞渠
路幾人擁華綺開門雪滿山人煙萬竹裏左右列琴書
所奉亦已侈逆寇就殄滅否極生治理汝歸應有時寧
遂久羈此說罷兩妻然門外霜風起

憶山居

世態今如此人生亦何慕巖風怒草木春到南郊樹步
屨人平沙鳧鷖願屢顧忽見西山來微茫隔煙霧宿昔
避世心浮雲展幽素朝看漁樵行暮隨猿鳥聚道力苦
未堅人羣被羈任遙指斷山口知是草堂路舉世喜多
端朱門無緩步我性實疎頑常恐世人怒畊種難後時
清溪淺可渡山鳥待歸人百年亦朝露

下相懷古

吳偉業

梅邨
太倉

驅車馬陵山落日見下相憶昔楚項王拔山氣何壯太
息取祖龍大言竟非妄破釜救邯鄲功居入關上殺降
復父讐不比諸侯將杯酒釋沛公殊有君人量胡爲去

咸陽遭人扼其吭亞父無諍言奇計非所望重瞳顧柔
仁隆準至暴抗脫之掌握中骨月俱無恙所以哭魯兄
仍具威儀墓古來名與色英雄不能忘力戰兼悲歌西
風起酸愴廢廟枕荒岡虞兮侍帷帳烏騅伏坐傍踣地
哀鳴狀我來訪遺蹟登高見茫碭長陵竟坏土萬事同
惆悵

縹緲峯

茲峯非云高高與眾山別其下多嵌空天風吹不折挿
根虛無際縹緲為險絕細徑緣山腰人聲來木末籃輿
雜徒步佳處欣屢歇躋嶺路倍艱往往攬垂葛灝氣凌
沈寥一身若冰雪輕心出天地羽翮生髣髴杖底撥殘

雲了了見吳越曜靈燭滄浪滉濔金光發陰霞俄已變
慘淡玄雲結歸筇破暝靄半嶺值虹蜺始知清境杳跡
其人鳥滅丹砂定可求苦為妻子奪看君衣上雲飛過
松間月

臨頓兒

臨頓誰家兒生小矜白皙阿爺負官錢棄置何倉卒給
我適誰家朱門臨廣陌囑儂且好任跳弄無知識獨怪
臨去時摩首如憐惜三年教歌舞萬里離親戚絕伎逢
侯王寵異施恩澤高高紅氍毹華鎧布瑤席授以紫檀
槽吹以白玉笛文錦縫我衣珍珠裝我額瑟瑟珊瑚枝
曲罷恣狼藉我本貧家子邂逅遭拋擲一身被驅使兩

口無消息縱賞千黃金莫救餓死骨歡樂居他鄉骨月誠何益

感懷

胡介

仁彥遠和

自昔受書日短褐抱珪璋挾策遊帝闕進退公卿旁漸與懷來殊能令士氣傷不知此中人何以見天王回車尋初服抱樸棲河梁比屋多耕漁鷄犬皆高京寄聲京雜人為惜日月光

野浦

杜立德

純一寶坻

橋轉層林外野鳧浴長浦遙見小漁舟沿堤過花塢人家繞岸居茅屋相參伍行人煙光深雲霞列環堵蒼鬱北山拱清流滿南渚造化老漁樵不為風塵侮喧喧城

市殷勲名馳寰宇對此境翛然萬物等塵土無限水雲懷煩囂吾不取

繁臺懷古

沈

荃

華亭

梁王全盛日置酒登此臺層軒出霄漢壯構凌塵埃當時侍從者一一皆鄒枚抽毫必金石酌醴盈樽鬪歡娛及百年盛事流九垓我來過彝門望古增徘徊浮雲亘千里宮觀成飛灰平池走狐兔阿閣生莓苔霜雪日以零風流日以頽衰雲有如此恨恨詎能裁

舟次見羣鴈

深秋風日妍鼓楫乘流駛廣岸淨無煙長河自瀾瀾高柳下殘陽羣鴈沙際起肅肅向南征相亂仍相比排雲

沒青旻列陣映寒水
裘回霜露間哀鳴
顧其侶感茲節序
移兼之悟物理羣
遊眷不違孤處情
難弭江海羨冥蹤
弋慕徒已矣何為
謀稻梁飄飄動千
里

登岱

林古度那子福清

人生妙登臨五嶽
稱為最岱則首厥
名居東峙安泰凡
山必有林秦松與
孔檜日月為蔽虧
河海以中外落落
具威儀諸靈悉來
會人民既祚生邦
國實攸賴怵惕事
遊觀巖泉紛映帶
暄涼備四氣何物
更重大吁嗟天地
功于焉見函蓋

元夕阻雨泊舟光福

錢謙益牧齋常熟

尋花不覺遠直入
梅花村孤篷坐滴
瀝清曉如黃昏未
能理蠟屐何暇開
清樽名花初發時
燕賞亦遲人西山
千萬樹亞枝赴朝
墩洗粧映流水薄
寒倚柴門豈知墮
煙雨掩抑空淚痕
梅花如靜女有恨
初不言我懷同楚
客莽莽欲斷魂世
無別花人此意誰
與論

飲酒

世多愛官者不復
知酒旨亦有愛酒
者不暇計官美愛
酒令人狂愛官令
人鄙腸爛飲不休
漏盡宦不止耆酒
與貪官皆可令人
歎我本愛官人侍
郎不為庫我亦愛
酒人致酒每盈几
今年命大繆官罷
酒亦耻長嘯謝都
門斯可以去矣

退谷

李天馥容齋永城

偶隨泉聲行還逐泉聲止泉聲近不鳴清流石齒齒孤
亭俯層巔滿堦紅葉委萬籟動笙竽嵐光生澗底秋氣
入夕佳微涼耽徙倚蓬瀛想金仙薜荔弔山鬼此地昔
流觴高會擬曲水我來悄無人空山落松子望遠資無
窮念往情何已兀兀碧檻前坐看溪雲起

昨日

昨日弔東鄰今朝唁北舍西家方讌賓笙簫喧晝夜歌
哭何喧闐欣戚迭相藉欣者固無端戚者亦姝假人生
如春華忽忽相代謝試究窮通理無為動深訝

上巳日作

陳之遴 素庵 海寧

昔有晉逸士上除憇蘭亭融融惠風來渙渙春波清羽

觴無停揮慨然齊歿生北伐何張皇東遷方晏寧豈怍
誓墓人沒齒心朝廷俗人羨高會知者謂遺榮逍遙修
竹間孰與明此情

雜興

朱鶴齡 愚庵 吳江

烈如齊聶政怒若燕荆卿我無雲雨資小勇安足矜老
子執謙退清淨垂鴻名莊周處不材後世稱達生灰心
滅恩怨劍術同飛塵

感遇

黠鼠貪空倉青蠅慕遺汁但與吾性違驅之恐不力出
門各有營蹇步安所適鷹眼自堪憎鴉林不可息矯首
望高原煙草方亂色寤言誰與期山川阻良覲憂至充

朝饑長歎聲惻惻

秋日

入門徒有懷出門復何遇隔水稻花香沿村漁火聚霜
葉丹平林一望物非故縱有西山童衰顏豈能駐

秋感雜述

李 壽 坦園 高陽

苦竹亦有節寒菊亦有芳哀此簷際花蕭撼委嚴霜物
性真貞脆順受固其常柰何末世士局促失行藏

春日遣興

冰雪氣漸遠頗覺天宇和西望歛朝煙峯影晴翠多社
燕葺故壘庭樹振柔柯羣動紛自適我寧憂虞羅白眼
向今古浩浩一長歌

舟發浦城

地形下東南灘溜如矢疾客行衝霧雨扁舟僅容膝鄰
粼沙痕高齒齒石鋒密礪礪中流鉅細狀非一狹逼
驚濤飛深沸漩渦溢舟楫巧紆避簸盪神先怵篙工一
失手勢爭洪波汨菴蒼崖卉稠奔激崖峯翠駭奇豫初
覽繁促厭縷述乘流怪浮生坎止私願畢

歸述

行行及敝閭驅車俄復止入門登我堂周眊如夢裏主
人遠行歸鷄犬亦相喜骨肉聚問訊應對紛難理莫拂
衣上塵相隨踰萬里

入棧

毛際可 鶴舫 遂安

入棧幾百里歷覽驚奇絕遙疑鴻濛初元氣互盤結中
磅是何年巨靈斧痕裂一綫逗空青日星乍明滅石留
太古雲泉噴中夜雪行人倚層屋螺旋與螳拆我來懷
沈憂耳目暫怡悅簿領半年塵滌以冰壺潔

登壺山亭

選勝快茲遊危亭俯歸鳥靜綠映深林一徑窮幽渺矯
首望層空日落荒城小煙嵐時蔽虧遙峯尚了了

述懷

屈大均 翁山東莞

少年學神仙披髮羅浮戲麻姑愛玉顏為作芙蓉髻綴
以明月珠拂以紅羅幌吹笛東南峰紫鸞來嘒嘒歡娛
曾幾時人世苦流離君為空中雲我為機上絲將絲繫

浮雲纏綿安可期悠悠望蓬山終古長相思

詠懷

出門操天弧吾將射四方豺狼日爭食曠野無人行民
生各有樂好修子為常桃李羞同華日月思齊光曜靈
久翳景麗天誰文章晞髮憑天門北斗斟瓊漿雖非丹
山鸞願巢阿閣旁雌雄三十六和鳴宣禎祥

落花

落花辭故枝飄零逐溪水道逢浣紗人拾花置懷裏與
君同春榮相憐貴終始但願東風吹長墮機中綺

發吳郡

曹溶 秋岳秀水

馳風繹寤言玩占崇履坦頗達仕止情竊慨名實短較

輓解山宇公流適溪館秉志好無營朝市用終緩行跡
曠難紀征服戎初澣粉檟洽周親鄉俗賤踈誕沙渚萃
貞翮雲木秀孤榦廻岫玄猿悲中陵素茗滿霏月不移
席悽節有時煖祛累塗易循抽文緒交纘養生悟莊寓
狗利慎尼罕涉目雖多娛千里在方瘡

焦山紀遊

顧夢游

與治江寧

巾車駕言邁煙草鬱秋原欲往心數止雨氣來前村入
舟漸清霽日色明山根了了見古寺臺殿松杉門直上
轉蒼翠雲英猶吐吞遂振所攜策登高若騰鸞日領神
已越况得攀與捫海色萬里至江聲亦何喧籬花與客
笑老僧澹無言于焉永年歲眺聽無朝昏俯視芸芸內
日月空崩奔歎息下東嶺撲面金波翻憇石餞落景濯
足臨潺湲何能謝塵累聊可清夢魂

古意

李雯

舒章華亭

美人碧雲外素影春風中自恃蛾眉色非關羅袖紅粧
成不可見揚抑深春院朝愁紫燕飛暮苦流鶯變欲作
陽春歌陽春柰若何清霜坐如此明鏡濕秋波

禱詠

趙文照

鐵源膠州

佳人十七八初隨荷戈子新粧飾綺羅不知丈夫歿朝
起過樓頭兄弟莫敢指眼含傷心淚人前不輕灑

夏日感懷

二首

魏裔介

貞庵栢鄉

富貴多磨滅貧賤亦支離人生天地間候忽如飈馳魯

陽不可倩誰能挽西曦惻惻烈士心常恐智慧衰榮名古所尚修業當及時

舉世尚浮華冠蓋自赫奕問以經濟方相對如窮颯咄咄殷深源虛名竟何益家國事方殷前箸須一借思君久鬱陶奮飛無長翮海月如可拾我欲掛片席

雜詠

蔣超 崑嶺金壇

縛樹為柔條專為弄妍姿結成萬年字取媚輕薄兒此樹憐不言殷勤謝故枝寄身籬壁間曲直難白持直當為青松曲當為紫芝

詠史

錢澄之 飲光桐城

人生重富貴要在還故鄉韓信過淮陰身封楚國王賈

臣歸郡邸腰懷會稽章故妻怨既報漂母恩亦償英雄不見道恩怨焉能忘得志論一時寧保後不亾二子非令終後世皆稱揚

傲淵明飲酒詩

古稱好飲酒其人皆大賢往往有所託遂以飲酒傳我獨何為者得飲即歡然我若不痛飲恐負此中天天今安在哉蒼蒼形正圓去我不甚遠可以相周旋

鴈門關

朱彝尊 錫鬯秀水

南登鴈門道騁望勾注巔山岡鬱參錯石棧紛鈎連度嶺風漸微入關寒未捐層冰如玉龍萬丈來蜿蜒飛光一相射我馬忽不前抗跡懷古人千載誠多賢郵都守

長城烽火靜居延劉琨發廣莫吟嘯扶風篇偉哉廣與
牧勇略天下傳時來英雄奮事去陵谷遷數子不可期
勞歌爲誰宣嗷嗷中澤鴻聆我慷慨言

滇陽峽

吳山多透迤粵山獨嶄崑壁立千仞餘洞壑俯穹嵌子
午見日月朝夕鳴松杉天風一以至蕭颯吹江帆懸崖
蒼長嘯空翠濕征衫側側飛仙度遠見浮雲銜何當斷
靈藥坐惜無長鑱

古詩

水母蝦爲目鱗鮪蟹爲足物有相須時迺得濟所欲人
無特立操空然愁幽獨所以古聖賢千仞削寒玉

李

楷河濱
朝邑

清商非清角誤者耳不聰詆壁謂之石其目無迺矇知
我良爲難虛譽亦無終吾自愛吾鼎人言等飛虹

上清宮

趙進美

韞退
益都

迢遙陟絕巘曉色靜閭里閑知雲上下默察峯終始鳥
喧紅泉邊雨止青松裏習習幽谷風疊疊寒溪水頗愛
煙嵐深因識清淨旨何須吹玉笙迺是瑤壇子

過雲夢

代馬行且嘶楚澤望欲晚獨樹秀中疇積水明修坂林
間棲羽稀巖動流雲滿煙薄遠城出路盡清溪轉日入
昆蟲鳴華鐙暖虛館

青青河畔草

吳太冲

默真
海寧

柳色今朝是春情明日非春情與柳色相照復相違對
鏡初停織行歌自採薇紫駟陌上任夫壻夢中歸無計
酬明月纔昏便掩扉

遊招隱寺

是戴顓故宅泊蕭梁太子讀書處

宗元鼎

梅岑江都

已向洞口遊復過招隱寺升日曜青春衆花何明媚山
徑轉紅亭窈窕窮幽致冷然殊泉香雙跑尤清翠彼美
徵士蹟千載猶足企阿姊真賢媛捨宅修遺志裙布能
如此舉世寧無愧傾耳聆黃鸝遙憶雙柑事追後歷兩
朝清華產帝系遺情向丘壑讀書居此地豈伊年命乖
時乘六龍戲感彼淮海禽一朝人間棄緇往事多存悲
今時忽異晦朔鼓循環遷轉無停位獨居尚含情憑弔

豈無慙奄忽難強留榮名不可墜

大梁道中

熊伯龍

鍾陵漢陽

帝京何煌煌車馬何彭彭所思隔冥阨涕淚霑衣裳窮
冬望春風春風多感傷夙昔無歡娛如何今斷腸憂樂
固倚伏意氣詎能忘侯嬴已千載中情誰與將活人問
盜蹠爲謀亦荒唐鄙哉鷄鶩情羣飛乖稻梁

雜詩三首

黃

永

艾庵武進

下流不可處尊名難久居嶢嶢者易屈皦皦者易污置
身清濁間與俗同奔趨首陽旣爲拙正則嗟誠愚衆人
皆已醉獨醒將何如

萋萋斫旁草鬱鬱嶺上松高下豈相及位置天心同斧

斤天長年枝榦俄成空憑君歲寒性摧折猶枯桐嗟嗟
寸草心旖旎爭春風

少年樂仕宦壯歲求神仙兩願無一成抱恨常繇繇有
人過我廬呼我爲狂癡刺繡先倚門力田豈逢年不如
學吹竽笑傲王侯前

東山吟寄懷洪阿士

趙潛雙白漳浦

朝爲東山吟夕想西山蕨梅花壓茅屋美人隔明月艱
危各自持何必常咄咄杜蘅今所搴檀樹古所伐老苔
縈敗砌疎星照短髮匣中貯秋水龍啼不及歇紫霓製
爲裳黃金鑄爲骨岱華破碎矣崢嶸在吾子入海妬鯤
鯨出門防犬豕吾聞古壯夫以身屬知己撫愁動燕雲

灑恨走湘水千艘已南下北風嘶萬馬離鴻失孤林悲
笳散空野乾坤涕淚中百年一長夜

乞竹詩

龔賢半千崑山

所買山下宅荒園纔半畝不敢種青松松前人易朽願
移竹數竿悉掩貧家醜今夜風雨聲忽然生戶牖誰能
割清陰郵書問鄰叟

五日宴東湖作

郭襄圖皋旭平湖

仲夏猶清和芳景映餘春修渚媚雲日彩舸盪江津狎
波揚靈鼓沸管接朱輪遠岩噴激沫停淵聳潛鱗洄波
多漾舟凌陸騫高民萬化乘日養爲樂及茲辰屢儻藉
岸草清謳飛梁塵秦娥起斜盼越女動微嚔寒箔雲鬢

清言不集
映懷珮越江親羽觴寧有紀喧坐衆無倫獨有雍門子
聞樂轉悲辛

感遇

徐乾學

健菴
崑山

汲水辨澗淄染絲別黑白古人傾蓋間流品先已擇寸
心苟相投薄軀非所惜寶劍解贈君出入耀光澤分手
去路衢萬里無間隔結交不須多樽杳亦何益寧聞管
鮑家堂有珠履客

擬古

柴紹炳

虎臣
錢塘

問君復何之玉門千萬里遙遙君遠行熒熒妾獨止離
別須臾間會面良獨難鴛鴦戲北沼蝴蝶飛南園所思
在遠道焉得顏色好不愁顏色落但念無饑渴昔別期

三秋今行踰九春棄置勿復陳有酒尚盈罇

古風

王士祿

西樵
新城

孤鶴稱仙驥矯翮青雲中圓吭應清商丹頂耀霞容遙
遙積靈祀肉疎毛以豐徘徊頓修趾日營天帝宮詎知
溷喧卑羈棲悼遇窮我聞相鶴經作自浮丘公以傳緱
嶺人藏在嵩高峯如何九臯禽顧影傷瓊璫

發井陘次故關作

凌晨發山郭渡溪指山隧稍稍歷原隰忽忽入幽邃天
陰嵐氣重草樹彌蒼蒼石路足蜿蜒懸崖遶虧蔽山橫
望若絕崖轉徑仍遂略無十步直大抵兩壁對行行近
關側巖巘尤奇怪撐者或如拒掠者或如墜麗疑蠻象

伏怒儼虓虎，巽千折勢不窮。各各殊狀類，睥睨界其上。
高與青冥會，謂此信天險。飛鳥詎得越，他時戎馬疏。何
無一九閉，俯仰意慨慷。指顧傷阨塞，安得凌絕頂。一覽
八荒外。

九江城南樓晚眺

邢昉 孟貞高淳

決漭九江口，日入煙濤深。登樓俯危檻，近見廬山岑。昔
人此讌賞，嘉月陶幽襟。長使千載下，緬想南樓心。孤城
何蕭條，殺氣餘秋陰。交衢無人行，荒榛遂如林。撫事遽
成往，含悽方在今。履運適如此，憂端苦沈沈。

高座寺尋介立上人作

黃葉落未盡，招提猶是秋。因耽清寂境，更上西齋樓。風

榛蔽遙阪，寒景下荒丘。惆悵故情歇，難為永日留。

落葉

嚴繩孫 孫友無錫

對酒每不樂，悠悠思長道。謂言落葉時，馬首秋風老。人
生聚散意，發興何草草。曉來北牕臥，策策驚懷抱。其彼
冰霜情，修除不能掃。憶昨山中春，青青著林杪。卽此念
飄落，何用慰相保。所希君子心，日夕存枯槁。

除夕同琴塘飲

李昌祚 來園漢陽

豈必廢絲竹，長嘯聲未絕。高燭照幽人，煙影趨蠓蟻。蠶
膾踰夙戒，子弟禮成列。有君敢辭歡，側足夢懷切。梅花
不須約，白髮不須折。大顛不須醉，舊曆不須閱。

黃山硃砂泉湯池

張愬 南邨江寧

清言不集
崖徑何蒼涼古寺傍溪曲丹砂產靈峯藥樹不可斲停
泓水一池温然蒸煖玉我非癖潔人愛向此中浴身心
恬以舒穆如飲醴醪十月巖風吹石澗方初旭

過煉丹臺有感

言尋煉丹臺荆榛一片石神仙與凡夫悠悠皆過客人
生天地間安能常跼踖旦暮成古今九州原咫尺採藥
問軒轅去後恐留跡容成與浮丘但見兩峯碧誰爲同
心人傾樽笑莫逆

擬古二首

劉梁嵩

玉少江都

芳草朝以蔚墜露夕以滋感此懷幽情相適會有時登
高望四方四方何逶迤游子如飛蓬佳人空踟躕

高樓俯廣陌珠箔相交加裊裊三婦豔皓齒含丹霞朝
臨樓上頭五馬停其車不解羅敷辭爭歌楊白花

春日遊城南趙氏園亭

梁清遠

葵石真定

春晴雪漸融綠波微蕩漾閑園養幽花無人自開放扶
筇恣遨遊高丘足眺望芳草尚含煙流雲何澹宕野漁
弄釣竿山僧供午餉玉友自清醇嘉賓遂酣暢輕颺吹
我衣歸途樂清曠非敢耽逸豫聊以滌塵障

春水曲

丁

煒

鴈木晉江

拍岸春水生隔船人如玉慊慊各自持或恐是相矚流
豔動清漪揚袂香斷續倚櫂看鴛鴦微吟懊儂曲

襍詩

野人設檻蹄縛虎如縛鼠方其見縛時剖腹有肥矜殺
身先後間相看何爾汝不見雲間龍天矯自遐舉繫戀
既不生飛潛恣所處歛跡視危機儼軫在平楚

秋日過天池山房

栢 古雪松

秋氣多在山捫蘿陟崇巔松翠冷巾裾遠鐘隔層煙芙
蓉削古壁天池開石蓮千峯老一僧白雲流堂前欲言
難爲語吾意亦悠然撫琴山欲響飛鳥歸暮天體物本
無機妙理何淵淵

遊練川飲趙雪岷席上作

徐秉義果亭

使君鳴琴暇爲我張綺席清輝澹簷楹幽花綴奇石秋
爽澄良宵歌聲動巷陌陶然酌旨酒靜對神自憚交深
棣萼間情愫在夙昔斯文追正始高論不能易君豈百
里才聊此沛甘澤一時快知己清言慰良覲讌笑何容
與壺觴白酣適佇看溪月明披雲湛深碧

古意

楊大鯤秋屏

冥酒列同輩燭華炤比鄰良朋如金玉賤子敢自陳弱
年工文翰藻思日以新飛揚薄英采直欲返雅淳十年
抱中素風雨動明神一朝出戶牖漸與聲名親穿鑿無
珠玉網羅無鳳麟中道方知悔俯仰遡吾真上有鳴鳳
翼下有潛波鱗人生貴適意塵土視朱輪

秋日述懷

長安多貴遊名倡艷華燭百斛蒲萄酒七采芙蓉褥諱

浪謂生平酣謠擲金玉香風度南陌珊瑚騁天駮恣意
快所如不畏羲和促歸來七載餘拭目縱圖錄讀書秋
樹黃命儔春山綠少年亦何嗟空名易為束美人在天
末時奏幽蘭曲

雜詩

巖我斯存卷歸安

楚客誇山鷄鳳凰羞為侶宋人寶燕石安知璠璣美真
偽詎難分柰何徒貴耳曲學以鈞名片言拾金紫豈不
美時榮願言敦素履修身以為期毋為識者嗤

別母

曾庭開寧夏

習習四月風萋萋一庭草遠離生我親言適萬里道下
拜泣沾衣慈母前相抱問兒遊何為母年身已老骨瘦

食不多氣衰寐漸少汝勿久行役恩榮吾默禱我聞此
言卑長跪起復倒負擔行且止中心怒如搗慘澹顧兒
孫承顏宜膝遠常使大母歡如我侍昏曉文章不驚世
安得功名早顯揚即有期吾願非溫飽

詠懷

毛蕃穉賓嘉善

驅車長安道冠蓋何紛華指揮生風雨笑傲凌雲霞一
朝忽失勢觀者盡咨嗟昔日東陵侯青門今種瓜浮生
若朝露何為競驕奢

武林春郊從湖墅步松木塲

呂祚德大不金壇

桑去蠶始萌羣動發生理苔色上石壁郊原綠如此東
風吹我襟隔墅見流水煙火徑中開輕刀錯猶蟻山水

亦云勞歸來酌新醴

詠懷

吳軫星子容縣

盛年去已半快意安可必攜瑟上高堂門巷復云夕枉渚棲鴻鶩空牀聞蟋蟀有思未敢言道遠不可即

中秋携今宵出都

史玄弱翁吳江

俄然去樊籠再遊江海天瀼瀼白露秋我行已二年京華事束濕龍沙渺烽煙黃金餐末士此輩無高賢怪汝蘭蕙姿識我思歸田相從願同行梳頭鞍馬前我家在江南採菱復採蓮自從遠行役湖渚空潺湲今果歸何如與汝相周旋大婦織流黃小婦隨機邊三日下兩絹匹匹絲纏綿其中我讀書文史聲相宣念此動高興豈計囊空錢汝車我馬行明珠雙照懸

計囊空錢汝車我馬行明珠雙照懸

人井陘

惲于邁含萬武進

昔聞太行陰今行井陘道獲鹿當咽喉嬰陴踞虎豹委蛇側肩進兩山夾奔峭冷冷魚貫風窮岬掩義照登車望岑崔弔古出幽妙天塹不可踰守之得其寶

登泰山

埃氛遍八極虎豹叢榛苓有客甲中原披雲覲皇靈廓然見天地萬壑皆空青松盤秦時蓋崖出漢馬鳴燁赫久已沒山川著真形日觀觀無始震動開杳冥晝夜有常期元化區濁清願言駕白鶴逍遙上太庭

南陂詩

莫與先大岸潛江

漢水幾千里 瀕洞奔潛 滋導川 昧禹經 厥土以塞之 溥
雨增濤 怒長堤 爛于糜 哀哉漢南北 魚遊升高枝 吾土
非善防 偶為馮夷私 小人屬無厭 股引灌 枯枝夜半驚
灑灑操 鍾立中泥 鄰壑良用媿 垂堂安可嬉

寄蔣虎臣

尤 侗 悔庵 長洲

昨夜秋風生 新涼動書帳 夢見謫仙人 騎雲渡河漢 顧
我話心期 蟬聯不能斷 回指天路長 旌旗忽飛散 寤聽
蟋蟀吟 卷衣起 嗟歎

里居

孫光祀 性庭 平陰

草色萌初綠 度春忽已半 晨起理短髮 餘寒猶未散 小
池注淺水 一勺清儿案 閑步無底事 鳥語適相喚 鍵戶

畏剝啄 俗務良所憚 守拙性固爾 出處原一貫 非以矜
獨行與世誰 冰炭嗟彼斗 笱人區區何足筭

黑夜池翫

呂 宮 蒼忱 武進

濃雲蔽欲周 月沒連星晦 風起怖驚人 暗動狐貓輩 我
故凭橋觀 佯眠不肯退 儘教醉眼昏 微出玄心對 踰久
氣潛舒 水天澄杳 匯始知大地光不在 日星內棲烏定
還驚躍魚冥 未廢泥停濁 水中終解浮珠琲 神靜白生
虛候齊丹 匿類君看碧綠鮮 功始桐油績 所以至人言
道明恆若昧

朝雲

李 鴻 青立 鄧州

朝雲漫東南 奇峯相鬱盤 海日明遠樹 光華若可餐 縹

清言不集
緲結飛閣金銀錯戶闌有時見神女珠佩鳴彩鸞有時
聞鐵笛跨鶴迎仙官網縕迷五色變幻非一端凝眸望
天際竚立槐陰寒

擬古

胡承諾景陵

大火西南流時節忽已過瑤光指白帝蹊隧始尉羅元
戎整輕武續紛何其多如何屬車側慘澹飛雙鵝六郡
良家子王侯今匪他練色窮五都雲帆蔽三河富貴從
所欲無人肯負戈七襄不成錦下土將柰何

白千尺幢緣猢猻愁行

王又旦初華

清晨杖輕策入谷二十里傾崖驟合杳梯棧空中倚無
翼如何度艱難方此始萬狀石磴磴紛垂縹纒纒攀縹

踏危石足頓不能起巖屋照頽陽曾岑倒松梓養力憇
煙靄迺知崎嶇美東南得高壁路隘不任趾亂峽無全
天坤軸忽奔北猿狖怯方啼吾生悵何恃太息展遠眺
前途尚嶮嶇

無定河

董文驥雲知

昔聞無定河遠使河之涘源自大荒來濁浪吼千里奔
流何湍悍頽沙性善徙地是古戰場四顧悲曷已其窟
漲征蒐貂錦三千歎時清無戰骨水寒終北鄙磨刀刀
未瑩飲馬馬不喜一望塞垣深九月邊風起歸渡會冰
堅悲哉遊宦子北首遡河源怨此南流水

訪僧

魏象樞環溪

遙聞十里鐘在山忽在水盤折叩山門老僧閑如此巉
巖綴虛空石閣輕于紙携手說飛登白雲簷外止

雜感

周迪吉

子傲
太倉

灞漣東流水穠穠桃李枝菁華難永保坐看秋風吹瑄
候將搖落桃李不自知高門冠蓋日東閣賓朋時一朝
恩寵去梁燕從此辭去年莊青翟今年劉屈楚覆轍相
尋續累卵高必危牽犬望里門鶴唳空遙思英君秉乾
柄帷蓋恩難施胡不早碎穀白雲相與期

治宅

王鴻緒

嚴齋
婁縣

疲繭棄人事結宇滄江曲宵戶羅疎星曉簾抱寒旭松
瀉滿逕濤竹碎臨巖綠試揣玄豹隱何似羝羊觸蕭散

卜畝間聊以存予欲

田家

偶步東江曲來憇西山麓西山高入雲黛色瞰平陸平
陸一以眺萬景快心日落落水邊村依依原上木縱橫
陌與阡田家濁酒熟肅然舒一嘯夕陽在茅屋

君子行

二首

田茂遇

鬚淵
華亭

古道浚而澹近情深且艱轉盼墮層暄咫尺覆層瀾巨
鱗不在水猛爪不在山曲土工險折坦者受其患睽暱
總弗計毀譽寧有端跼踖俛仰際躑躅登臨間莫以蘭
蕙誼鄙夷瞬息懽莫以金石質擯絕柔媚顏大造罔不
有渾淪以相安毒螫隨所遇規行冀自全嬰孩狎怒獸

虛舟濟狂川在昔無心子任天以為賢

君子慎細微幽隱貴自知譽至不以喜毀集不以疑夙
夜祗黽勉衾影辨慙欺流言顯姬旦削跡見孔尼名高
苦炫俗道大易違時所懼在處利所豫在見危昭昭勉
無忝冥冥勗在茲至剛慮小屈太素防微緇釋謗必內
反日省敢辭疲弗以一青掩反為小人嗤

感懷

宋

琬 蒹葭

商飈凜勁秋昊天降霜露采采孤葵根展轉愁其足幽
蘭在庭阿馨香莫能蠹君子諒不惜零落傷中路庶事
多賢理人生信所遇俛仰終古間誰知龍與蠖

徐塘口曉發

舟過十六間快如脫深井篙節喜不眠鳴榔夜相警暉
暉星欲稀獵獵風初猛登艫一長望澄波浩千頃樹杪
見黃河蛟龍得所騁上下白雲光凌亂蘆花影宿鷺浴
還飛驚鴻斷復整孤櫂破寒煙荷衣不知冷

寓懷

王曜升

次谷太倉

有客為我言驅車過瞿塘有客為我言揚舸下太行世
路盡顛倒豈必因滄桑玉露凝空階金飈發高堂蕭榮
香艸枯心懷怒如傷何以慰君子願進千年觴

過信陵君奪晉鄙軍處

金

鎮

長真山陰

人臣無專擅所以明至尊胡為魏公子竊符應平原讀
史起疑情常欲吐一言秦圍趙乞師趙存六國存公子

有早見設計解軍屯事迹則已僭內心猶可捫戰國主
合從信陵爲發源會上魏王書歡與六國援指斥虎狼
秦嗚咽輒聲吞古人逝水駛戰壘春草蕃智勇冠當代
三君安足論昨從大梁來惆悵城東門

俠客行

李贊元

素園龍溪

長安遊俠客結識徧四方夜宿邯鄲肆日馳白驪驕門
下多歛士衣履珠玉裝千金買寶劍淬礪日光鋌射獵
上林苑殺人燕市傍百萬酬知己一飯不能忘解兵用
談笑抵掌屈侯王小哉秦舞陽獻圖廼倉皇請纓事戎
伍何論殺與傷男兒歎牖下白骨汚山岡

古意

陳廷會

際叔錢塘

朔風吹廣陌之子將遠離贈我金琅玕涕泣不忍辭哀
鴻鳴雲間鳥鵲喧樹枝路遠從此發懷憂心煩滋幸有
清商曲可以寄其思弦匏聲哀切遊子當何期仰視白
日速浮雲從西馳握手不盡歡奄忽踰良時我有瓊蘓
漿聊用敘中私願君慰離別斟酌無復疑

吳山山閣雜詩

二首

許之漸

青嶼武進

昔賢懷至道振拔滂塗中今人嗜聲利汨沒忘我躬專
已取其殘怨至猶若矇石泉清可啜白雲時可籠簞瓢
我何憂傾蓋亦可逢浩浩全元倪悠悠和氣充特此保
吾生仰荷大化公
落落寡時用早衰力弗強摧顏竟何裨矯情亦卒瘁徒

倚從所適水山足徜徉譬彼波上鷗妬猜兩相忘樓頭
山色佳浮雲任飛揚欣與數晨夕人事空茫茫

聞箏

楊繼經傳人
蕪水

高樓西北起中夜秦箏發纖指流清商繁絃促明月彈
之豈有懷聞者已淒越俯仰此遺音徘徊誰得歇

止宿大文新居

陳允衡伯璣
南昌

短轅逐暮景言訪子雲宅平疇屋宇增垂楊映南陌遺
書積香氣微月澹魂魄琴歌足平生愛此郊居僻夜寒
具燈火旨酒慰病客觴酌不在多清言永茲夕

詠懷

二首

諸九鼎駿男
錢塘

奇驥負鹽車驅之上太行太行一何峻詰屈似羊腸北

風颯然至道滑天雨霜十步復一跌鞭策徒傍皇語驥
且勿哀圉人非孫陽躑躅仗櫪下仰天空悲傷
鳳鳥異域來飛飛下青雲好姸實佳麗毛羽殊繽紛鷄
鶩不度德將欲與之羣鴟鴞不知醜日夕偏見嗔鳳往
叫虞帝閭闔不得聞古道既卓遠歎息復誰論

雨中詠蘭

譚篆灌村
景茂

山靄陰雲生疎林復細雨習習灌崇蘭清艷抱寒土新
叢祕幽花風過香徐吐垂簾煙景微深翠侵虛廡涼澍
不後時天心眷秋圃寂寞良辰消夢遠湘江浦

過射虎墩懷周孝侯

蔣景祁次京
宜興

孝侯迺國士片言三害除射虎斬長蛟折節因受書改

行不一年名譽滿天下捐軀酬國恩毫末無假借嘗過
石亭南松柏猶桓桓英風不可接瞻對生餘寒荆溪一
泓水誰復砥狂瀾

感遇

朱一是近修海寧

高原何莽莽白日昏以黃顧景茲已迫游子心傍皇我
行薰風吹忽及朔風涼故鄉不可期故人絕容光豈願
離故鄉道路阻豺狼欲行陸無輪欲渡河無梁有酒不
能醉悲歌變宮商佇立再三歎泪下沾衣裳

月夜

許之溥庶庵武進

寒氣約耳目草木來空新寥寥庭宇中霜露肅我神夜
深影響盡月正青天真空煙化爲水浩蕩如江濱每思
萬竹下水石清粼粼薇蕨成情性明月爲終身斯懷旣
靡遂多病離亂辰良友各高蹈棄我如微塵豈無衆年
少特以謔浪親使我終日內遇靜如歸人閉門勿復道
念之徒苦辛

擬古

王澤弘吳廬黃岡

種樹長秋花鑿池待春水故人永相託所得僅如此水
逝有還波花落無生理安知同堂客不似千萬里萬里
隔鄉縣有時自相見片言偶乖離對面顏色變願言白
頭好不願白頭早白頭難與期此心私自悲

燈花

徐倬方虎德清

槭槭風入林肅肅霜叩扉寥寥空堂上寂寂燈花垂朱

華明灼灼紅蕊弄輝輝人見燈花喜我見燈花悲終年
羈旅客形影相因依詎有高朋至諒來好事稀可憐蘭
膏光偏照遊子衣家人寄尺素亦報燈花飛夜夜白髮
新盼盼遠人歸寒戶惜餘光高門耀九微共在明燈前
榮悴不同時銀缸一寸燄客髮千縷絲燄落可重燃絲
白不再緇手剔燈花起迴牀涕暗滋還持蠟燭淚遠寄
長相思

雜感

余 齋 生 生 青 神

抱影坐寒宵形神自親切因念平生來遇事多反側古
人不我欺黔婁姝可則身在豈徒貧舌存或用默天意
屬微茫誰能假顏色慨然念黃虞終身食其力

雜詩

陳台孫 階 六 山 陽

孟夏綠葉腓青陰屬蒼昊易得紉帶華難逢不歎草平
畛接丘壠寧必待耆老已極聲色歡所冀在壽考三秀
未及采風露令中天玉童拜木公辭世一何早聃耳向
流沙開關出西道瓊篇不可聞長慮漫浩浩

擬庾亮月夜南樓飲讌

葉 封 慕 廬 黃 陂

高樓度良夜芳尊集嘉客弱冠懷濯纓謬忝歷疆場灼
灼芙蓉池羣英佐擘畫矯首思龍驤眷言愛駒隙努力
崇景光傾情當此夕君子酒既多老夫興猶劇露涼秋
已清江空月逾白蒹葭鬱參差梧桐墜百尺飛觴亂簪
履浩歌恣瑤席樂極慮悲來宵闌感疇昔偷榮日蹉跎

清言初集
止足意所宅何如雲間鶴離塵振遐翮

咏懷

毛會建客山武進

野鶴出層霄長魚縱深壑物理信宜然我心何索索抱
壁而塗乞不如棄廣莫抵鵲愛蒼胡禦鼠惜繁弱士有
至性存異軀不合膜卷之彌區區放之滿寥廓

商丘曉行

梁允植治涇真定

霜夜鷄啼早不寐下繩牀啟戶看星辰太白爛生光僕
夫促我行殘月照書囊朔風吹凍雲縷縷起東方一息
盈四野顧盼失周行長空飛煙霧相對意徬徨趨蹌赴
茅店零雨濕衣裳小憇飲土簋慘澹各神傷茫茫千里
色何處是家鄉

渡揚子江

蔣 塤黟縣武進

江關日莽落抱節戒遠遊視夜霜露繁攬裳涉方舟自
昔波浪惡故人重阻修今來弄兩槳水落依寒洲山寺
塌何日江楓吹不休未即我所思莽立千年丘回首白
日破大哭天東頭蕭蕭海門鴈蕩蕩湖南秋一葉脫已
去流水不我留

冬青引

王 暉丹麓仁和

城北河之干冬青與天接不解競繁華青光自擘擘長
夏覆濃陰嚴冬傲霜雪枯苑任紛紜罔改平時色桃李
花爭開笙歌度昕夕如何當歲寒獨有冬青葉

婦怨

江 闔辰六新貴

十五嫁君家操作無休息終朝事賃春寒夜勤組織遭
家多難時匍匐不遑食矢志實無他願效雙飛翼山盟
曾未寒胡使妾心惻覲面亦歡娛相愛匪相得妾豈顏
色衰君非能好色慎毋惑青蠅青蠅禍叵測慎毋厭糟
糠素心毋反側寄語我良人愛君須以德

別聞天廸

周斯盛 此公鄞縣

愛此村雲閒如遇佳山水兩載恰幽心况有數君子讀
書貧賤中論詩霜雪裏獨立愧古人哭兀生悲喜賦別
自昨秋有客慕千里宗子亦西泠高懷惟有爾伊子如
新葉春風吹之起一心孤于舟慨然念行李相望在江
波相期在蘭芷

人

郝浴 雪海定州

號物之數萬其理惟一真真在人間世千家萬家春所
以古君子象鳥慕其親英英雲露下溼我舊松筠秋香
隨花笑岳翠其誰鄰慈鴉猶父子蜂蟻尚君臣敢謂屠
龍客無計出飛塵釋解青螺髻老駕紫河輪相觀蟬脫
去自驚轉丸新顧以大圓裏保蟲繁星陳束髮開混沌
喉舌聲信信窈窕紅粉凶頑怒鬼神若與理為仇日
夜鑿其醇一朝勢擺落蝴蝶幻吾身即以得魚筌罵此
傳火薪受恩如滄海不足供笑嘖可憐綱常上旭彩發
秋旻親日為之祝君日為之甄聖日為之鐸賢日為之
津三萬六千日並無一箇人親情與君義千載空酸辛

假如蓄僧髮使冠蓮花巾又如燬道籙強垂寮家紳叛
彼而服此于理嗔不嗔乃惑人家子繪裂其絲綸已恨
孫升木不匡東效顰况讀聖人書毛髮亦陶鈞何為成
陌路羣飛鷺振振

擬古

繆永謀

天自嘉興

蘭若生芳洲馨香隨風發美人被羅襦娟娟若華月明
珠交翠羽流光艷城闕日暮歸重幃獨居感時節自顧
陽春華誰能待霜雪

泊舟采石

孫錫蕃

蘇州黃岡

一笠動波輕遂易名為客插流多奇峰夕陽浮遠舶行
雲濯素襟樵霞煑白石山色終古來蒼涼悲太白

結交行

徐延壽

存永閩縣

古人重結交伏劍四方走慷慨出片言索得於期首視
歿如鴻毛桃哀與嬰曰為語今世人此道復何有鳩毒
藏其心羊腸出其右有恩不如讐險處君知否

衍曹子建美女篇

三首

姜希轍

定菴山陰

木葉森庭柯憑軒拊綠綺娉婷整素衿纖纖彈玉指遺
音有餘思希聲隨山水曲終祇自憐朗月空堦徙
春波流日夜連袂大堤頭羅帶隨風起飄飄洛水游踏
歌天上曲微笑遞輕眸最憐青草薄新承雙玉鈎
吁嗟妾薄命窈窕酒家胡遙遙汲深井銀牀鳴轆轤令
顏耀朝日日影上芙蓉盛年誰不羨詎止執金吾

追憶高景逸周蓼洲顧塵客

諸君子

范鳳翼

太蒙通州

嗟此流俗下黃虞不可作厲志崇令儀弱植慚虛薄眷
然念亾友言笑宛如昨奸慝據台司仁賢糜鼎鑊莊生
病爲犧禰衡歿于鶚天運已飈馳詎忍尋真樂仰希達
人軌俯謝浮名縛無用同散樗息影還冲漠

偶成

陸祚蕃

武岡平湖

蠨蛸不吐絲網罟絕汚池沙鳥不留迹文章還素質天
不靜宇宙巧自昆虫出遂使羲農時早離太古日

夏日有懷

王嗣槐

仲昭仁和

朝雲不歸山暮雲墜作雨黃鵠狎天飛不知有藩宇世
慕勿過營失足嗟網罟卜築西山陬幽花媚村塢獨處

心若忘喜與麋鹿伍

客新城送伊公入山

魏

禧

冰叔寧都

庭花開不齊春風卷簾幙幽人欵我門怡顏共談謔駕
言之雪嶺揮手謝城郭此間饒修竹春冬無榮落下有
林塘村炊煙到丘壑令我懷翠微空山誤猿鶴我宿不
好禪頗好方外客師行我興孤何處拽雙脚

嶧山門

張新標

鞠存山陽

漾舟清光旁湖山自相藉空翠映微暘積靄澄遙夕不
見滄波滌惟覩遠天碧泛泛水上鳧森森厓畔石白雪
冒丹岑青莎蕤綠澤潛鱗樂深淵歸翼斂修翮魚鄉網
作田水驛舟爲宅蘭芷行未芳芙蓉紛可摘晞髮澌成

紋拾月涼生席魯甸眇長津淮川連廣陌相將騎鴻鵠
山川其猶懔

江亭有感

莊泰生 東味武進

大地宿陰霾俯檻洪濤濶悲風長江來千里吹我襏東
鄰勢燠天締交錯紵帛拔茹慶彙征彈冠到阡陌揮霍
改其常金盤出鑽核耀炫亂情理眉睫起戈戟平生漆
與膠轉令疑匪石此物本無良詎關交道厄貧富足歿
生奔命各不惜真宰未混茫號吼開汨沒羲皇難至今
慘澹冥光積颺鼠叫牀頭蛛絲亂蜴齧山鬼相啾啾明
川正窓隙絕代撫佳人起坐江天碧

感懷

周 質 青士嘉興

一藝皆可食斯文獨長饑時命有適然詎曰所業非顏
子甘簞瓢仲尼稱庶幾藜藿苟可充孰能慕甘肥

岐亭

褚 篆 蒼舒蕪州

縈策至岐亭因思古隱者道服方山冠射獵曾怒馬光
黃多異人坡公每心寫當時不可見况復千秋下荒城
映落日天風散秋野寂寞榛莽間清淚與誰灑

飲酒

陸世楷 孝山平湖

人生不得志慨然思著書著書欲何為將謂名所居書
成或嬰禍名盛無全軀左丘既喪明子長亦刑餘不聞
博陵族其里皆為墟始知造化心相與安其愚生子當
秉耒勿使事伊唔惟有田家酒可以常相娛

巴湖看月

朱嘉徵

岷左海亭

江鄉改歲華風物仍芳節臘臥洞庭雲春醉巴湖月鳳
吹揚哀音騷人調白雪思婦倚高樓樓上停刀尺那惜
十年遊鶉衣生百結鄰舫奏琵琶濕盡青衫客

秋懷

梁以樟

公狄清苑

秋序忽復短日月不相除憂來代新故有恨中如愚立
蟬急暮林砧杵鳴寒廬僚慄傷我懷還讀篋中書首陽
厭脯肝東陵咽蕨餘朝營魯連宅暮宿子雲居人靡不
有初斯世遂已徂已矣勿復陳散髮荒庭隅山燈出墻
竇炤見好眉鬚潦倒二十年寶刀化為鉏出入隨我影
不念腹中癯低頭媿古人我始為饑驅

詠秋紅

牛 魚

潛庵長治

羣卉春爭艷茲莖秋始華森疎映籬落飛丹不作花勁
質挺霜下後時寧見嗟攀折幸無及爛熳餐朝霞

晉陶潛

黎士弘

愧曾長汀

鋤却當徑菊傾盡鄰翁酒先生臥北牕風味于何有醇
醪晦英雄性情累家口乞食空爾為庭雀喧五柳今時
韓王孫有人進食否

懷蔣侯齋瀟湖東堰

惲日初

遜庵武進

蔣子隱湖曲脫迹耘芝田神鋒不能收急節蕩清絃補
毳誚華組綿古撫陳編有酒招商山張目無青天垂綸
散鷗鳥泛竹弄淪漣時呼西牖雲再嘯南林煙詠詩陶

空襟玩物忘所牽自我放巖野永謝區中緣悠悠念同
袍陵谷俄已遷嗟彼平時歡玉性非貞堅卑音借高響
景曲表不延與子結素風心契肥遯賢翱翔青霞上寤
寐黃虞前不見閭闔暉何能返瑤淵徒歌想丹梯挈壺
瀉江泉鶴鳴在東臯餐松悅徂年

讀史

殷

岳

伯巖
鷄澤

推遷歷六九既往但草草俛仰大塊中何物幾于道原
無適俗才焉用託散藻時論多學術認真爲枯槁折衷
遡前賢寡過以終老

寶應作

陳維岱

魯望
宜興

朝移五兩輕暮向射陂宿長隄障湖水湖水高于屋歷

歷煙中帆邪許時相續

山居

羅世珍

魯峯
漢陽

山中結茅屋僻徑遠囂塵白雲留戶牖碧蘚空磷磷洗
竹情多逸看花意自新會倚荷鉏月時欹漉酒巾卽事
搜奇字因端竟古人觸目無窘趣天地豈私貧枉羨伯
通庶何如王翰鄰數楹分讓樹與其鹿門春

夏夜同友小酌後作

汪

楫

舟次
江都

荒城犬初吠老樹烏復唳不知新月影已挂長林西斗
酒聊爲樂旣醉更相携輝輝弄螢火煙草仍萋迷仰視
河漢明飛星過前谿寢興各有適萬物安能齊達人夢
蝴蝶志士聞荒鷄嗟予亦何爲慘惻悲鼓鼙

言懷 二首

人人知愛敬天下無賢聖人人務耕織天下無道德六經諸史外文字皆蜚賊百家競紛紜聖教愈充塞大哉秦始皇一火祛其惑

韓洽 君望長洲

古之兵皆農農富兵亦強古之士皆農農樸士亦良兵農一以分家室無餘糧士農一以分耒耜無文章待哺難為兵忍饑難為士分之則三傷合之則一理請告當塗人治亂實在此

呼鷹

談允謙 長益丹徒

鷹擊不中兔慚憤不來歸奈何令健翮飄搖隨風飛猶可圖再舉何不且相依瀝血劈雉膈足慰壯士饑坐視

此狡兔安能突重圍

擬古

阮旻錫 疇生同安

夏日常苦熱冬日常苦寒焉得天氣和常如三月間幽州當九月野外雪霜乾嗟彼遠遊子不畏衣裳單吾生各有適達者貴身閒如何百年內淹忽隨悲歡

征婦寄衣

顧景星 黃公蘄州

有客發渭城言之交河漢霜閨各有寄裁縫裂端綺香停鈷鋤火熨暖蓄薇水切切兒女仁慇懃豈如此今夕金錯刀宛轉向織指晨裝就長道與君共萬里有家常寄衣無家復何似持謝衛將軍功成勿為喜

述懷

李以籍 聲叔漢陽

清言不集
女貞未字時貴賤命所適男兒不遇身飄若風中翼既
無國士知何勞豫讓漆草木本無能應爲君子疾欲竊
處士名雷同羞顏色

山居

張仁熙 長人廣濟

我老艱難內性靜能賤貧所憾立志晚坐令白髮親邇
者謬聞道一一反諸身寄躬清濁中寤寐惟天真安土
百無戀尚爲子逶迤令名不敢薄令德常苦辛向來所
憂樂久置復具陳豈能輕歲月三緘忘諄諄

擬古

趙吉士 恆菴休寧

鷓鴣不知鴻呼蜉安識鶴分量相懸殊寧復可臆度爰
茲修竹廬觀書亦崖畧因之念古人高風尚如昨寥寥

寄緬懷天地一郭郭

郊行

嚴正矩 絜菴孝感

連日不出門門外山景異嵐峰向晴空千里橫黛翠桃
柳綴新堤松柏圍古寺漁樵歷歷見風俗含古意前村
沽濁醪五斗尚不醉捨事徐行行蕭然一傲吏

偶然作

吳雯 天章蒲州

農夫何辛苦畊獲霜露閒蠶女守桑筐一裘常不完嗟
我纔知書坐食衣有綿天心豈見私遭逢或偶然苟不
崇令德是謂參冥頑讀史皆上口玩物喪本源組織月
露辭及物輸一錢何以報元化勉哉當體乾

秋懷

李子燮 以理梓潼

雍州八九月西成獲稻梁田家自富貴百穀充高箱少壯輕遠遊執業廢就荒微名負夙昔顛毛遂已蒼故交附書至瓠苴且肥香陶然歸敝廬兒女各成行

春游

應撫謙嗣寅錢塘

乘興理春衣行游擴情素雲物散芳暉延賞隨所赴山均草木長鬱鬱展生趣披覽古人碑靜言如有遇俄聞鐘磬音已出前溪路

比類

魏 閻名閻漢川

蘭生雜棘莽樵蘇斧以斯本非惡木質能勿爨下資移植申椒叢貞潔適所宜零落吐朝蘂遠風香與馳美人氣相若婉出斷金辭叮嚀紉佩者木難間玉芝慎哉幽

芳物莫使棄如遺

送葉井叔還黃州

梅 庚耦長宣城

仙客狎金門豪士薄華省末俗誰見明夏蟲怪霜冷之子澹蕩人清詞激湘郢一試絃歌宰二室足幽騁竭來隨徵車未肯競項領長嘯歸舊山凜秋北風猛驚沙逐斷蓬征鴻時一警去去望何極相思楚江永

偶然作二首

王豫嘉九青扶風

平子歌四愁所思在遠道人生目睫間百憂已盈抱朱明晞朝露秋霜下庭草晷度有循環白日苦不早濟鳩義士歸軾蛙勇夫歿茲事亦偶然物感遂如此夫何同室人趨趨不敢邇本非秦與越誰辨淄澠水

春遊曲

沈嗣選

仁舉嘉興

大堤諸女伴聯袂踏春陽帶綰同心結衣薰百和香
花憐蒂並折柳暗條長轉側留餘態回身整薄粧行行
穿徑去無故斷人腸

咏懷

張

喆存默華亭

矢志託巖阿淪棄甘鴛劣庭幃有老親菽水念方切
雌來山陬稻梁計何拙荒城鳴鶴鷓淡草多蛇蝎松菊
雖就蕪投簪仰前哲何時繼高蹤小山鋤明月

擬古贈蔣玉淵

高層雲

謾園華亭

楚臺推宋景梁苑重鄒枚冠蓋紛縱橫清辭金石諧
但覩衆寶美未聞公子才何如邁景運煌煌朱邸開英
姿

本天授淹雅更無儕好文兼愛士令聞騰九垓寥廓
頓雲羅用以弋鴻材毘陵有上客抱道航蒿萊手握荆
山璆光瑩絕織埃翻然慕高義托乘相追陪良會君子
堂雕藻璨崔嵬綵雲接飛蓋仙醴浮行杯明月照華軒
秉燭正徘徊新聲繞蘭楸奇舞凌瓊臺酒酣忽授簡逸
思發雄裁擊鉢逞妙辭四座歡如雷千金重一顧中心
自縈回夫豈貴知遇良因攬德輝願言奉末照以副飢
渴懷

田園雜興

戴

小宋景陵

黃犢飯青坂鷓鴣鳴我廬及時出耒耜澤澤事膏腴
耕淺苗自稀耕深本自舒護塍謹蓄洩澍雨應斯須日
暮

臨清猷禾香襲衣裾陵倉詎足多食力用歡娛

華嶽紀遊

翁富業

以偉錢塘

鴻濛混一氣太華挺金天巨靈劈峻壁三峰削何年嗟
嗟戊之夏百道涌洪泉千門萬戶傾薨棟欲澗邊由此
關新途曲屈馬屢躓崎嶇抵五里石關當路造峽轉通
天宮山如鐵甕圓四壁絕鳥跡獨立呼飛仙再進莎蘿
坪坐久刊百緣遙見大上方高巢石上懸拔蘿尋羽宮
猿引難鐵縷履壁膝挂頤俯視驚危淵望望水簾洞磴
道千尺躔盤曲訪古峽云是希夷眠杳冥側半壁拱讀
篆籀鐫兀突折山塼白日飛流湍左顧靈虛臺振衣風
翩遷丹碧燦石罅仰矚空垂涎右顧毛女洞避秦來嬋

娟從此通箭括委宛十八旋北望黃渭河墮地兩小川
反覺天地窄竟忘日月煎須臾登天門古樹流雲煙忽
睹東西峰兩角天半連云此有伏虎今見獼猴踰瑤草
半難狀無風自芊芊空坪開青柯寶閣雙闕聯雖未捫
星斗已凌帝座前思陟蒼龍嶺同侶畏迤邐焉得九節
杖直窮玉女巔環顧不忍去日已規西偏涉險有七歎
媿余鮮歷焉初步謁雲臺志在趨高岍如何終偈仄竟
日山中穿恨不踞絕頂下瞰雲雷駢性喜探危巘茲遊
獨悄然秦碑并漢碣摩壁讀未全俟秋上雲梯把臂侶
偓佺

題聽松圖

范必英

伏菴長洲

松性孤且直落落蟠山岡點綴石與泉氣象何蒼涼清
風徐披拂奏響猶笙簧或時聲吼號發怒助土囊如何
歲寒姿因物而異常况于人哀樂中年尤難忘王子志
淡遠置身托棟梁西湖久飲馬孤山梅已荒何處青青
蓋蔭此晉賢裝入山倘不淡匠斤晚其旁冥高多烈颺
濤聲捲錢塘聆茲不平鳴益恐增憤傷覽圖坐復起無
地堪行藏

春日園居

李世恪共人

朝雨溼輕花日出照滋露中有好鳥鳴交交如道故振
衣下青階飛過櫻桃樹

山閣

吳晉介茲

倚閣見青山不識門前路雲霞漸開爽宛見江邊樹帆
影亂流漸鷗羣傍人度孤嶼號天風長廊散花雨空寂
醒塵襟幽賞滌心素為問遠公禪蕭瑟遲日暮

擬謝靈運齋中讀書

陳錫疇星彥

伊余江海情夙昔曳鳴佩電勉京華踪乍與時運會返
車棲岩阿甲志芟羣累丘壑謝人徒鳥雀靜相對顧已
雖寂寞展卷遵冥晦心賞及古人理感觸物類矧乃翰
墨并奇懷愜中外狗祿良苦拙退耕亦云瘁微尚趨何
途達生緬無愧抱此遺物慮遺榮得所貴

遊武陵枉山

翁介眉武原

陰晴變景色花信送清暉樓閣湧地立城頭鼓角希一

身如輕舟片帆停漁磯攀蘿陟高岡林禽鳴翠微交交
感鄉思觸緒中心違俯視春田闕秧針綠漸肥窩峰轉
乾明修竹盤千圍猛虎擊敗壁毒龍潛井穢丹砂溢流
赤影幻波濤飛鐵塔鎮今古山鬼慘不威麓列七石碣
羣坐無是非銅佛亦涅槃零落體半衣梵宮亂煙草昨
始新薹薹野火吹寒岫柳花眷春扉不知何王墓垣斷
牛羊依出禮金剛塢廢興隱玄機萬物無長年感歎等
芳菲徒留善卷名陳跡委荒穢勞勞風塵吏來此偶息
機江花邈空翠沅水繞叢倚明霞落水面晴樹半依稀

